

Hawaaritay Ooso Gelo

Hawaaritay ooso maxaafay, Luqaasa Wonggilepp kaallii xaafintteez maxaafe. Yha Maxaafayis yez waanna qofay tiina Yesuusana kaallee asitay Geeshsha Ayyanay kaalithin, ebaz odiza wonggile qaala, Yerusalaame, Yihuda biita ubbayil, Samaare, sa7a gaxapp gaxa hellodayis (1:8) wayizii heltheezako ododiza. Maxaafay, ammano Ayihude asitaypp aykkii, kunth alamel yez as ubbayis amo maaqqod hellodayis wayizii dalggeezako odiza taarike. Ya maxaafa xaafeezay, ammaniza asitay Oroome kaatetitha laalodayis ganccer tobinttiza asi baazannee ammano Ayihuditay haymaanote folo oothiza maaqqeezana erisodayis miinggii ootheeza.

Hawaaritay ooso maxaafayid Yesuusa bagga odiza Wonggilay helliza aqo uba wode dalggittar dalggittar yhanigizannee woosa keeth eqqo qonccisiz hayidzii aafe aqo shaakkinttodayis danda7iza:

1. Ammano Yerusalaame jammareezay Yesuusa salo kezini.
2. Ammano Isreele gade ubba hello bagga.
3. Oroome gujjii Meditiraane Abba yuushar yez gade ubbayid dalggeezana beezi.

Hawaaritay ooso maxaafayid aadhii benttizay Geeshsha Ayyana ooso maaqqodar, Phenxeqosxe gallas Yerusalaame yez ammanizitayil afa wolqqar wodhdheezana odiza. Yey

garkkekka, maxaafay gancce qoncceez oosita ubbayil bentteezay garkk Geeshsha Ayyanay woosa keethinnee woosa keeth aqisizita kaalitheezannee minthatheeza gujjii odiza. Hawaaritay oosay gancce oosintteez oositaykka kiitay ammaniza asay de7olannee woosa keeth pettipettithayid yez wolqqay ab garkk dammazako beeziza.

Hawaaritay oosay aykkeez qofita

Markkatethis giigintto 1:1-26

Yesuusa wurssith kiitannee Geeshsha Ayyanna bagga inggeez qaala 1:1-14

Yihuda aqo Maataasa doorintto 1:15-26

Yerusalaame markkattithii 2:1–8:3

Yihuddannee Samaare markkattith 8:4–12:25

Phawuloosa hawaaretith oosa 13:1–28:31

Tiina hawaaretithis yhanigo 13:1–14:28

Yerusalaame shiiqo 15:1-35

Nam7antho hawaaretith yhanigo 15:36–18:22

Hayidzanth hawaaretith yhanigo 18:23–21:16

Phawuloosa Yerusalaame, Qisaarannee Oroome acinttitha 21:17–28:31

¹⁻² Tewofiloosa, Yesuusa fa oosa aykkeez wodepp salo yhanigeez gallas hellodayis, ootheezibazinneer tamaarsseezibaz ubba taanii ta tiina maxaafayid xaafeeza. Salo yhanigodaypp tiina E fa dooreez hawaarita Geeshsha Ayyanar azazeeza.

³ E fa iita waaya ekkeezaypp guye yhayiqopp dendeezana gaame markkatithar sidhe baazin qonccisii untis fana beezeeza. Oyttam gallas

unttis qonccii Xooss kaatetithibagga unttan taamarsseeza.

⁴ Pettii wode unttera wolla yezar unttan yhayigarkk yeegii azazeeza: «Ta yinttis odeeza, ta Aday immad geez ufayss qaala naagoyttapp attin Yeruselaamepp kezippate.

⁵ Abis giiko, Waannisa haathar xammaqqeeza, zin xiqqa wodepp guye Geeshsha Ayyanar yi xammaqinttoda» yeegeeza.

Yesuusa salo yhanigeeza

⁶ Hawaaritay Yesuusana hellii eeko, «Godayyo, Isra7eelitayis ne kaatetitha mahiz woday yhayaanee?» yeegii oyceenza.

⁷ Yesuusa unttika, «Ta Aday fa mawuter oothiza wodannee laytha yi erodayis danda7ooya.

⁸ Zini Geeshsha Ayyanay yinttal afa wodhdhiz wode yi wolqqa ekkoda. Yeypp, guye Yerusalaame, Yihuda gade ubbayil, Samaarerannee biitta gaxapp gaxa hellodayis yi taas markkita maaqqoda» yeegeeza.

⁹ Yeya geezaypp guye unttaa be7adar, dhoqq dhoqq gi, salo kezin shaarakka eza u aafaypp geentheeza.

¹⁰ Yesuusa yhammadar unttaa salo fude be7adar, booth ma7o ma77eez nam77ii asitay qopekkazin u achch baggayir eqqii,

¹¹ «Galila asayyo, salo bi7ittar, yi abis eqqeenee? Yha yi be7adar salo qiteez Yesuusa yhannii garkk maaqqii ye7oda» yeegeeza.

1:4 Luq. 24:49 **1:5** Mat. 3:11; Mar. 1:8; Luq. 3:16; Wan. 1:33

1:8 Mat. 28:19; Mar. 16:15; Luq. 24:47-48 **1:9** Mar. 16:19; Luq. 24:50-51

Yihuda aqo Maataasa doorintteeza
(Mat. 27:3-10)

¹² Yeypp guye, hawaaritay Dabire zayite Ambalapp Yerusalaame maaqqeeza. Dabire zayite Ambay Yerusalaamepp maala gallasa yedhith garkk haakiza.

¹³ Unttii Yerusalaame gelii, fooqeel afa kezeeza. Unttikka*: Phixiroosa, Waannisa, Yayqqooba, Indiraase, Filphoosa, Toomaasa, Barttolomoosa, Maatoosa, Ilfoosa na7a Yayqqooba, Qanataza† Simoonannee Yayqqooba na7a Yihuda.

¹⁴ Yhayttitay ubbay maachchitayr, Yesuusa indat Maaramirannee Yesuusa ishitayira ubbay pettii wozinar maaqqii ubba wode miinggii woosiza.

¹⁵ Ye wode Phixiroosa xeetannee laatam maaqqiz ammaniza asay shiiqeez aqo denddii eqqii, yhay garkk yeegeeza:

¹⁶ «Ta ishuntho, Yesuusana aykkeezita kaalithee Yihuda bagga Geeshsha Ayyanay tiina Dawute doonar odeez Xooss qaalay polinttodayis beeziza.

¹⁷ Yihuda nuur wolla yha oosa oothodayis maraxintteez asii.»

¹⁸ Zin Yihuda iita oosor denggeez miishayir gade wonggeeza. E sinor pokkin, e ulay peedhintin; e maracay zazintteeza.

¹⁹ Yihudal afa haneezibaza Yerusalaame yez as ubbay si7eeza. Yey gishos, ye gada fa gada doonar

* **1:13** Maala gallas yedhithgarkk guusay pettii kilo metre oge guus † **1:13** Qinatiza guusay Ayihuditay ammao wogasinnee fa gades micinttiza as **1:13** Mat. 10:2-4; Mar. 3:16-19; Luq. 6:14-16

«Akaldadaama» geeza. Akeldadaama guusay Suuth biitta guussii.

²⁰ «Yeykka mazmuure maxaafayid,
«E karay kallo atto;
oonkka ezayid yezippee.

Ma e shuumatitha haray ekko» ginttinttii xaafint-teeza.»

²¹ «Yey gishos, Goda Yesuusa nu gancce yezeez wode ubbayid nuur yezitayppe,

²² ma Xammaqiza Waannisa wodaypp aykkii Goda Yesuusa salo yhanigeez gallas hellodayis nuur yezitaypp pettii asii e denddayis nuur markka maaqqodayis beeziza» yeegeeza.

²³ Yey gishos, asay doorodayis Yosixoosa giz Barssabaasa ginttinttiza Yooseefannee Maataasa nam7ita shiisheeza.

²⁴ Yeypp guye, Xooss woossitar, «As ubba wozina eriza Godayyo, yha nam7itaypp ne oona dooreezako nuna beezoba.

²⁵ Yihuda fa aqa qitii, ashsheez oosannee hawaaretith oosa ekkoday garkk yhayttitaypp nuna beezoba» yeegeeza.

²⁶ Unttal afa ixa olin Ixay Maataasal afa wodhdhin Maataasa taphpho pettii hawaaritayll afa guzhintteeza.

2

Geesha Ayyana wodhith

¹ Phenxeqosxe giz gallasay helleez wode amaniza as ubbay pettii aqo shiiqii yeza.

² Qoppekkazin wolqqama gote garkk guummiz guumthay salopp yi7ii untii yez keetha kumeeza.

³ Tama lath aaziz iranthitay untis benttitar, shaginttii shaginttii untal ubbayil afa beteeza.

⁴ Untii ubbay Geeshsha Ayyanar kumii duma duma doonar odinttoday garkk Geeshsha Ayyanar untan udin odintto aykkeeza.

⁵ Ye wode biitta ubbapp ye7eez Xoosis yashittiz Ayihuditay Yerusalaame yeza.

⁶ Ye guumtha si7ii gaame asay shiiqeeza. Ammaniza asay u gade doonar odinttodor si7eez gishos

⁷ yhay malabaz gi, «Yha odinttiza as ubbay Galila as baasa?

⁸ Yeezin, nuunii, nu yelintteez biitta doonar untii odinttodor wayizii si7odayis danda7eeney?

⁹ Nuunii Pharixe, Meede, Elaame, Mesophotaame* yezitay, Yihuda, Qaphadooqa, Phanxoosa, Iisiya,

¹⁰ Phirge, Phinfile, Gibxxe, Qaarina achcha yez Liiba yezita. Nuupp baggityikka Oroomepp ye7eez asita.

¹¹ Ayihuditaynnee Ayihudetitha ammano geleez asitay, Qarxeesannee Arabe asitay, Xoossii oothiez gita oosa nu qaalayir ododar si7iza» yeegeeza.

¹² Ubbay malabaz gi, godibaz dhabin woliko, «Yhayi ab maaqqodeshsha?» yeegeeza.

¹³ Zin yhankkitay, «Yeyitay uzhi matheembay» yeegii untal ari7eeza.

* **2:9** Mesophotaame guussay nam7i haathitay gancce guussii ye haathitaykka Ephiratoosannee Tigra

Phixiroosa nashsha

¹⁴ Zini Phixiroosa, taphpho pettii hawaaritayira denddii eqqii, fa qaala dhoqq udii, untiko yhay garkk yeegii odeeza: «Ayihuditayyo, Yerusalaame yez ubbitayo, taanii odiza si7oytta.

¹⁵ Wonttapp hayidzii saate maaqqeez gishos yi qoppizay garkk yha asitay mathekkaya; yey yint-tis erintto.

¹⁶ Zin yhay haneezay nabe Iyu7eela odeezay polinttoday garkkes

¹⁷ ««Xoossii, wode wurssitha yhay garkk hanoda yeegiza:

taanii as ubbayil afa ta Ayyana gogisoda.

Yi dhiirath na7itaynnee maachch na7itay,

tinbbite ododa.

Yi paanthitay qonccith be7ada;

yi cimitay ahumo ahumoda.

¹⁸ Ye gallasitayid tana

ammaniza dhiirathi ayllitayil afannee

maachch ayllitayil afa

taanii ta Ayyana gogisoda;

unttii tinbbite ododa.

¹⁹ Ma taanii afa salor oroth baz,

oommo sa7arakka malla beezoda.

Suuthii, tamannee wolqqama cuya fuullo bent-toda.

²⁰ Gitannee bonchcho maaqqeez Goday gal-lasay

hellodaypp tiina awa dhumoda;

aginakka suuthii aazoda.

²¹ Ye wode yhay garkk hanoda;

Goday sunth xeegez oonkka attoda»

yeegeeza.

²² «Isreele asayyo, yha qaala si7oytta. Naazirete Yesuusa oonatithay, Xoossii yi gancce oothetz wolqqama oosayirannee malatitayir yinttis qonciza yi, yi ubbas eriza.

²³ Xooss tiina fa erarannee fa shenayir Yesuusa yinttis aadhii inggintteeza. Yi eza higge baa asitay kusher mazqalel afa sottis yi wodheeza.

²⁴ Zin Xooss yhayiqo wolqqa dhabisii eza den-theeza. Yey gishos, yhayiqo eza aykkodayis danda7ekkaya.

²⁵ Dawute ebagga odittar,
«Taani dagammaamay garkk,
Goday ta ushachcha yeza.

Goda ubba wode ta ta tiina bi7iza.

²⁶ Yey gishos, ta wozinay ufaytteeza;
ta doonay ufayssar kumeeza;
yhayqqiz ta asetithay ufayisar yezoda.

²⁷ Abis giiko, ta shemppa Si7oole ashshaamii.
Ma ne Xillay aha wooqqithaami.

²⁸ Neenii tana de7o oga eriseeza.
Ne taar yezay gishos ta ufayssay kunith
maaqqiza» yeegeeza.

²⁹ «Ta ishuntho, nu ada Dawute bagga ta yinttis geeshshii ododa. Dawute yhayqqii moogintteeza; e duufay yhayino hellodayis nu kale yeza.

³⁰ Dawute nabe maaqqeez gishos Xooss e sheeshaypp petta e kaatetitha zufaanaayil afa betithodayis ees caaqqeez caaqa eriza.

³¹ Yeyi gishos, Kiristtoosa dendda tiina bi7ii, «E shemppay Si7oole attekkaa; e asetithaykka wooqqekkaya» gi odeeza.

³² «Xoossii, yha Yesuusa yhayiqoypp denttheeza-yis nuunii ubbay markka.

³³ Yey gishos, Xoossii fa ushachcha eza dhoqq dhoqq udii, ees inggod gintintteez Geeshsha Ayyanay ufayisa fa Xooss Adaypp ekkii, yhaya yi yhatti bi7izannee si7iza nuul afa gogiseeza.

³⁴⁻³⁵ Yeykka, Dawute fa ommas salo yhangekkaya zin:

««Goday, ta Goda,

«Taani ne morkkita

ne tokes yedhdhith ago udod hellodayis

yhaydda taapp ushachch bagga bettoba geeza»

yeegeeza.

³⁶ «Yey gishos, yha yi mazqalel afa sotteez Yesu-usa, Xoossii eza Godannee Kiristtoosa maheezana Isreele as ubbay tumapp ero» yeegeeza.

³⁷ Asay Phixiroosa geeza si7in u wozinay bochinttin Phixiroosannee yhankko hawaaritayko, «Nu Ishuntho, yeezin nuunii ab udo?» yeegeeza.

³⁸ Phixiroosa untiko, «Yi nagaray atto ginttint-today garkk nagaraypp maaqqii, yi pettay pettay Yesuus Kiristtoosa sunthar xammaqinttoyta. Xooss inggiza Geeshsha Ayyana yi ekkoda.

³⁹ Yeykka Xoossii inggod geez ufayss qaalay yinttisii, yi na7itayisinnee Goday nu Xoossay faak xeegez haakko yez ubbitayis» yeegeeza.

⁴⁰ Phixiroosa unttis hara qaalakka gujjii markkattii, «Yha wode zhuca asayil afa ye7odayis yez pirddaypp yinttan ashshoytta» yeegii zoreeza.

⁴¹ Phixiroosa odeezana ekkeezitay xammaqintteeza. Ye gallas hayidzii mukule maaqqiz asay ammanii gujintteeza.

⁴² Unttii hawaaritay timirttayid, pettipettithar, katha wolla muusarannee Xooss woosar miinggeeza.

Ammaniza asay pettipettith yess

⁴³ Hawaaritay kushe gaame oorothibazinnee malabaz haneezay gishos as ubbay yashitteeza.

⁴⁴ Ammaneez ubbitay wolla yeziza; paas yeza baz ubba pettipp shagintteeza.

⁴⁵ Unttii paas yeza baz bayizii miishe pettayis pettayis koshshizay garkk shagiza.

⁴⁶ Ubba gallas pettii wozinar maaqqii Xooss kara shiiqiza. Fa kara pettay petta xeezii ufayssarannee ashikke wozinar katha miiza.

⁴⁷ Xooss galatittar as ubbayir sabintteeza. Goday ammanii attizita gallas gallas untal afa gujjiza.

3

Wobbo athay paxeeza

¹ Pettii gallas Phixiroosannee Waannisa Xooss woossodayis uddufun saater Xooss Kara yhanigeeza.

² Yelintteez gallasapp aykkii toke sileez pettii athay Xooss kara geliza asaypp miishe woossoday

garkk ubba wode lo77o giz Xooss kara penge gal-
las gallas ki7ii gaddizazin.

³ Ye toke sileez athay Phixiroosannee Waannisa
Xooss Kara gelod hanodar bi7ii untan miishe
woosseeza.

⁴ Untikka eza dakkii bi7ii, Phixiroosa «Nuuko
yhana bo7oba» yeegeeza.

⁵ Toke sila athay untapp akko baz demmada
aazin untan be7eeza.

⁶ Zin Phixiroosa eziko, «Taas birannee worqqa
baaya, zin taas yeza baz ta nees immada.
Naazirete Yesuus Kiristtoosa sunthar denddii
yedhdhoba» yeegeeza.

⁷ Yeypp guye, sila athayis ushachch kusha aykkii
dentheeza. Ellisii e tokaynnnee qilccay miinggii
atteeza.

⁸ Athay guppil denddii eqqeeza. Gedennee
yhana yeth aykkeeza. Yeypp guye, yedhdhitaran-
nee, guppitar Xooss galatittar untar wolla Xooss
Kara geleeza.

⁹ E yedhdhodarannee Xooss galatodar asii ub-
bay eza be7eeza.

¹⁰ Be7eez ubbitaykka miishe woossodayis lo77o
giz Xooss Kara pengel betteezay eza maaqqeeza
ereeza; E haneezibaza bi7ii malabaz geeza.

Phixiroosa Xooss kara odeez sibkata

¹¹ Athay Phixiroosappennee Waannisapp
duuxaam gi aykkii yezin asii ubbay malabaz
gi, Solomone barandda giz aqo wolla untiko
woxxeeza.

¹² Phixiroosa asa bi7ii asayiko, «Isreele asayyo,
abis yhaya malabaz gee? Woy abis nuna
dakkii be7ee? Nuunii nu wolqqar woy nu

Xooss lo7ottithayir yha atha yetheezibaz yinttis aazinee?

¹³ Afraame, Isaaqa, Yayqqooba Xoossay, nu aditay Xoossay, fa na7a Yesuusa boncheeza. Zin yi yhayiqos aathii inggeeza Philaaxoosa bili7odayis koykokka yi e tiina, «Nuunii eza koyooya» yeegeeza.

¹⁴ Yi geeshshannee xilla, kaddii, shemppo wodheeza yinttis billoday garkk Philaaxoosa woosseeza.

¹⁵ De7o inggiza yi wodheeza, zin Xoossii yhay-iqopp eza dentheeza. Yeyis nuunii markka.

¹⁶ Yha yi bi7izaynnee eriza asay paxii minggeezay Yesuusa sunthar ammaneez gisho. Yha yi ubbay tiina eza yhay garkk patheezay E Yesuusa ammaneez gishosi.

¹⁷ «Yhattekka ta ishuntho, yinttikka yinttan kalithizitaykka, erekkazar ootheezana taanii eriza.

¹⁸ Zin Xoossii binii nabitay ubba doonar, «Kirst-toosa waaye ekkodayis beeziza» yeegeeza polintoday garkk udeeza.

¹⁹ Yikkee, Xoossii yi nagara atto goday garkk maarototh gelii Godayiko maaqqoytta.

²⁰ Goday kalepp minthatho wode yinttis ye7oda. Goday tiinatii dooreez Kirsttoosa yinttis dakkoda.

²¹ Xoossii fa geesh nabitay doonar binii odeezay garkk ubba baz oroxxiza wode hellodayis yha Yesuusa salo gam7odayis beeziza.

²² Muse, «Goda Xoossay tana dentheezay garkk yi ganccepp yinttis nabe denthoda. Yi E giza ubba

si7oytta.

²³ Ye nabay oda si7oowa as oonkka as ganccepp shaakinttii dhabo» yeegeeza.

²⁴ «Ma Saami7eelapp aykkii yez nabitay ubbitay yha wode bagga odeeza.

²⁵ Yi nabitay na7ita; ma Xoossii Afraames, «Sa7all yez as ubba taanii ne sheeshay baggar anjjoda» yeegii nu aditayis geleez qaala caaqo laa-tiza na7ita.

²⁶ Xooss yinttan ubba yi iita ogaypp mahii anjjo-day garkk fa na7a denthii yinttis tiina dakkeeza» yeegeeza.

4

Phixiroosannee Waannisa ayihude shanggo ti-ina

¹ Phixiroosannee Waannisa asayis ododar qeesitay, Xooss kara naagizitay halaqaynnee Saduqaawitay untiko ye7eeza.

² Unttii Yesuusa yhayiqopp dendeezannee yeypp denddeezayid yhayiqopp denddo yezana woya taamarsseez gishos yiloteeza.

³ Yey gisho, unttan aykkii sa7a omatheezaypp wonttod hellodayis achch kara gelseeza.

⁴ Zin qaala si7eezitaypp gaamitay ammaneeza. Ammaneez dhiirath asay taybay ichchin mukule heleeza.

⁵ Wonttitha gallas kaalithizitay, cimitayinnee, higge asitamaaritay Yerusalaame shiiqeeza.

⁶ Ye asay gancce qeese halaqa Haanna, Qayyaafa, Waannisa, Iskkindirennnee qeese halaqay kara asitay ubbay yeza.

⁷ Hawaarita fa tiina eesi, «Aba wolqqar woy o sunthar yhaya yi ootheene?» yeegii oyceeza.

⁸ Ye wode Phixiroosa Geeshsha Ayyanar kumii, «Woya halaqitayyonnee, cimitayo,

⁹ yhayino yha wobbo athayis oosintteez lo77o oosayil E wayizii paxeezako yi nuna oyciko,

¹⁰ mazqalel afa yi soxxin, Xoossii yhayiqopp dentheez Naazirete Yesuus Kiristtoosa sunthayir yha athay paxii yi tiina eqqeezay yinttisnee Isreele as ubbayis erintto.

¹¹ «Yinttii gimbbizitay borii ixxeez shuchchay, keethe muumer tookkii aykkiz kirkiro garkke, ubbaypp aadhiz shuchch maaqqeeza; ye shuchchay Yesuusa.»

¹² Yey gishos, atatithii e baggarapp attin hara o baggarakka baaya. Nuunii e sunthar attod garkk as ubbayis Xoossii salopp oommor inggeez hara sunthii baaya» yeegeeza.

¹³ Shiiqueez asay Phixiroosannee Waannisa yashsha bayth odeezana be7eez wode untii tamaarekka cere as maaqqeeza akaakii malabaz geeza; untii Yesuusar yezayana ereeza.

¹⁴ Ma paxeez athay Phixiroosarannee Waannis-ara eqqeezana asay bi7in godibaz dhabeeza.

¹⁵ Zin Phixiroosannee Waannisa bale kezoday garkk udii fa gancce,

¹⁶ «Yha asita nu ab udo? U kushe oosintteez gita mala bazay Yerusalaame yez ubbayis benttiza. Nuunii yeya eroowa godayis danda7ooya.

¹⁷ Zin yha oday as gancce laalinttaama ygarkk yikkepp guye yha asitay Yesuusa sunthayir ooskka odaamayinnee taamarisamay garkk miinthii odii» yeegii zorintteeza.

¹⁸ Uttan xeezii, Yesuusa sunthayir yhannipp gede yesha odaamay garkkennee tamarssaamay garkk azazeeza.

¹⁹ Zin Phixiroosannee Waannisa untiko mahii, «Xoossis kiitinttodayippennee yinttis kiitinttodaypp Xooss tiina aay lo77ozako an yi pirddoytta.

²⁰ Nuunii be7eezi bazinnee si7eezibaz oda ashshodayis danda7ooya» yeegeeza.

²¹ Woya cimitayinnee kaalithizitay kaseesaypp miinthii naagisii uttan dakkii ashsheeza. Asay haneezibazayis Xooss galatiza gishos uttan seerodayis danda7ibe7ekkaya.

²² Ye malatayir harggepp patheez athayis laythay oyitamapp aadho.

Ammaniza asay woosa

²³ Phixiroosannee Waannisa bili7inttii untar ammaniza dabbitayiko yhanigii, qeese halaqitayinnee cimitay faako geezbaz ubba untis odeeza.

²⁴ Unttii yeya si7eez wode pettii wozinar maaqqii Xoossa yhay garkk yeegii woosseeza: «Ubba mooddiz Godayyo, salo, sa7a, abbannee u gancce yez ubba baz medhdheezayyo,

25 Neenii ne ayllana, nu ade Dawute doona Geeshsha Ayyanar,

«Woya abis yiloteenee?

Asay abis cere tobbeenee?

26 Sa7a kaatityinnee

gade haarizitay pettipp Godayil afannee

E Kiristtoosal afa denddeeza» yeegeeza.

27 «Tumakka, Herodoosannee Phenxe Philaax-oosa Ayihude baa asayirannee Isreele asayira ne tizheez ne geeshsh Na7a Yesuusaa afa dendodayis yha katamayi shiiqeeza.

28 Ma ne wolqqayidannee ne shenayid udod gi qopp betteeza ubba untii poleeza.

29 Yhattekka Godayyo, u mandditha bo7oba; nuunii ne ayllitay ne qaala kunth wozinar ododay garkk nuna danda7isoba.

30 Ne geeshsh oosancha Yesuusa sunthar hargganchchita pathodayis, oorathibazinnee malatitay oosintoday garkk ne kushe miccoba» gi woosseeza.

31 Unttii Xooss woosseezaypp guye ye unttii shiiqeez aqay eni7eeza. U ubbay Geeshsha Ayyanar kumin Xooss qaala goobi odeeza.

Tiina ammaneez asay pettipetteth

32 Ammanizitay ubbay qofarannee wozinar petto maaqqeeza. Unttii paas yeza baz tabaz geekkazar pettipp shaakinttiza.

33 Hawaaritay Goda Yesuusa yhayiqopp dentheez gita wolqqar markkattiza. Xooss untis ubbayis aadho keehatithaypp gaanthii inggeeza.

³⁴ Biitta woy kamppa yezitay ubbay bayizii ek-keez miisha ki7iza gishos ammanizitay gancce metintteezay pettakka baaya.

³⁵ Miishe ki7ii hawaaritayis inggiza; ye miisha pettayis pettayis koshshizay garkk shagii shagii inggiza.

³⁶ Qoophiroosa giz aqo yelintteez Yooseefa giz Lewe sheeshaypp maaqqeez pettay yeza. E suntha hawaaritay Barnnabaasa geeza. Barnabaasa guussay Minthatho na7a guussii geeza.

³⁷ Barnnabaasa paas yez biitta bayizii miisha ki7ii hawaaritayis inggeeza.

5

Hanananee e machchat Saphphiro

¹ Pettii Hanana giz athay fa machchat Saphphirir gade bayizeeza.

² Ye bayizeez miishaypp fa machchat erodar shagii ashshii, atteezana ki7ii hawaaritay toke kale gaddeza.

³ Zin Phixiroosa Hananako, «Neenii Geeshsha Ayyana dooshshoday garkkennee biita bayizeez miishaypp shagii ashshoday garkk Xalahe ne wozina abis geleenee?

⁴ Neenii bayizodaypp tiina biitay nees baasannee? Ma ne bayiz maaqqinkka miishay nees baasannee? Yeezin, yey garkk oothodayis abis ne wozinar qoppeenee? Neenii Xoossal afa worddo-teenep attin asal afa worddotekkaya» yeegeeza.

⁵ Hananee ye qaala si7eezangarkk pokkii yhayqqeeza; yeya si7eez ubbay iita yashitteeza.

⁶ Na7atitha asitay denddii e aha ziidhii aflar xaaxii kanggii moogeeza.

⁷ Hayidzii saatepp guye Hanana machchat yeya erekkazar Phixiroosa yeza aqo geleeza.

⁸ Phixiroosa iiko, «Yi biitta yhannii garkk mi-ishes bayizeenee? An taas odoba» yeegeeza.

Izaka, «Ee, yhay garkk miishes bayizeez» yeegeeza.

⁹ Phixiroosa iiko, «Neerannee ne azinayira Goda Ayyana faaccodayis abis zorintteene? Yeezako, ne azina moogeez asay baler yeza; nenakka untii bale kessoda» yeegeeza.

¹⁰ Izakka izir Phixiroosa toke achcha pokkii yhayqqii ateeza; na7atithitay gelodar yhayqqeezano denggii bale kessii, I azinay kale moogeeza.

¹¹ Woosa keeth ubbaynnee yeya si7eez hara as ubbay loythii yashitteeza.

Orothibazitannee mala bizita

¹² Hawaaritay gaame malatitannee orothabazita as gancce ootheeza. Ammaniza ubbay Solomone barandda pettipp shiiqeeza.

¹³ Hara asaypp pettii asikka untan hellodayis minggekka, zin asay untan bonchchiza.

¹⁴ Ammaniza dhiirathitaynne maachchitay tay-bay kaseesaypp gaanggittar gaaggittar qiteeza.

¹⁵ Yey gishos, asay hargganchchita halarannee arssar tookkii Phixiroosa aadhodar e eeshay untapp pettayil pettayil afa shemppoday garkk oge doona kessii gaddeeza.

¹⁶ Ma gaame asay Yerusalaame kale yez katamitaypp hargganchchitannee tuna ayyana waayisiza asita ekkii yi7iza; ubbaykka paxeeza.

Hawaaritayil afa bayi7ith dendeez

¹⁷ Qeese halaqaynnee ezir yez Saduqaawitay ubbay qinaater kumii hawaaritayil afa dend-deeza.

¹⁸ Hawaarita aykkii woya achch kara oleeza.

¹⁹ Zin Goda kiitanchchay qamma achch kara penga dooyii hawaarita bale kessii,

²⁰ «Yhanigii, Xooss kara eqqii yha de7o qaala as ubbayis odoytta» yeegeeza.

²¹ Hawaaritay yeya si7eez wode wontt guura Xooss Kara gelii taamarssso aykkeeza.

Qeesitay halaqaynnee ezar yezitay yi7ii, Is-reele cimita ubba xeezii shiishii hawaarita fa tiina ko7oday garkk wotaaddarita achch kara azazeeza.

²² Zin wotaaddaritay achch kara yhanigii hawaarita denggekka. Guye maaqqii yi7ii woyas,

²³ «Nuunii yhanigodar achch kara ibithay mi-inthii gorddettin, naagizitay pengel eqqeezita denggeez. Zin nuunii penga dooyodar gancce hara attozin pettii askka baaya» yeegeeza.

²⁴ Yey gishos, Xooss Kara wotaaddarita kiittizayinnee qeese halaqitay yeya si7eez wode «Hawaaritayil afa abi haneene?» yeegii taweeza.

²⁵ Ye wode pettii athay untiko yi7ii, «Yeezako, achch kara yi gelsseez asitay Xooss kara eqqii asa taamarssiza» yeegii untis odeeza.

²⁶ Xooss Kara wotaaddarita kiittizay fa wotaaddaritayira yhanigii hawaarita ke7eeza. Zin untii fana asay shuchchar shocoda gi yashitteez gishos untan aaddashii ke7eeza.

²⁷ Unttii hawaarita ki7ii, shiiqeez shanggo tiina ki7in qeese halaqay untiko,

²⁸ «Yinttan nuunii ya athay sunthar tamaarssamay ygarkk miinthii kiittekka? Yeezako, yi timirtta Yerusalaame katama ubba heltheeza. Ye athay shemppayis nuna oyicishodayis qoppine?» yeegii oycceeza.

²⁹ Phixiroosarannee yhankko hawaaritayir untis mahittar, «Nuunii asis kiitinttodaypp Xoossis kiitinttodayis beeziza.

³⁰ Mazqalel afa yi sottii wodhdheez Yesuusa nu aditay Xoossay yhayiqopp dentheeza.

³¹ Isreelitay nagaraypp maaqqoday garkkennee u nagaray atto gintinttoday garkk Xooss Yesuusa haarizannee ashshiza udii bonchchor fappe ushachch baggar betitheeza.

³² Yeyis nuunii markka; ma Xooss fana kiitintizitayis inggeez Geeshsha Ayyaanaykka markka» yeegeeza.

³³ Shiiqueez asay yeya si7eez wode iita yilottii, hawaarita wodhodayis qoppeeza.

³⁴ Zin as ubbayid lo77o bonchchintteez, higge asitamaaray, Gamaalale giz pettii Ferisaaway denddii eqqii hawaarita xiqqa wodes bale kessoday garkk azazeeza.

³⁵ Yeypp guye, shiiqueez asayiko, «Isreele asayyo, yha asitayil afa yi udodayis qoppizabazipp naaginttoyta.

³⁶ Abis giiko, yhaypp tiina Tewodaasa fana, «Taanii damma» gi denddin, oyddii xeet maaqqiz asitay ezar ma7intteeza. Zin eza wodhin eza kaallee ubbay laalinttin pathoowa as maaqqeeza.

³⁷ Yeypp guye, asay taybinttiza wode Galila yez Yihuda denddii gaame as pangga mahii kaalitheeze, zin ezakka wodhin eza kaalleeze as ubbay laalintteeze.

³⁸ Yhattekka ta yinttis odiza; yha asitaypp shaakinttoyta; untan bochchipatte. Abis giiko, yha qofannee yha oosa as oothizabaz maaqqiko dhaboda.

³⁹ Zini yha qofaynnnee yha oosay Xoossapp ye7eeze baz maaqqiko, yi untan dhabisodayis danda7oowa. Yeyititar yi Xoossar kaccinttoda» yeegii odeeze. Yeyi gishos, shiiqeeze asay Gamaalale zoriza ekkeze.

⁴⁰ Hawaarita kara xeezii gelisii alanggar garafeeze. Yeypp guye, untiko, «Yesuusa suntha nam7intho denthipatte» gi bili7i dakkeze.

⁴¹ Yesuusa sunthay gishos untii kawushoday beeziza baz maaqqeezana ereeze gishos shanggita tiinapp ufayttitar kezeze.

⁴² Untii ubba wode Xooss keethannee as kara Yesuusa E Kiristtoosa maaqqeezana taamarsizanannee sabbakizana ashshekkaya.

6

Laappun asitay doorinto

¹ Ye wode kaalizitay taybay gaanggii gaanggii yhanigodar, Girike doona odinttiza Ayihuditay Yihuda yelinttii yez Ayihuditayil afa oolleeze. Abis giiko, Girike doona odinttiza Ayihuditay, «Gallas gallas ingginttiza kathayir nu azinii yhayqqeeze maachchitayir urqqiza» yeegeze.

² Taphpho nam77ii hawaaritay woosa keeth as ubba xeezii, «Nuunii Xooss qaala odiza ashshii katha gishodayis nuus beezooya.

³ Yikkee, nu ishuntho, lo77o asita, Geeshsha Ayyanarannee ecetithar kumeez laappun asita yi ganccepp dooroytta; nuunii untan yha oosayis shuumoda.

⁴ Zin nuunii, nu kuminth wode Xooss woosarannee qaala tamarssor peeshshoda» yeegeeza.

⁵ Hawaaritay odeez oday as ubba ufaysseeza. Yey gishos, ammanorannee Geeshsha Ayyanar kumeez Isxifaanose, Filphoosa, Phirokoroosa, Niqaarone, Ximoona, Pharmmeenannee Ayihude ammano gelii maaqqeez Anxooka Niqoloosa maraxeeza.

⁶ Untan hawaarita tiina ki7in, hawaaritay untal afa kushe gaddii Xooss woosseeza.

⁷ Xooss qaalay dalggi dalggi yhanigeeza. Yerusalaame yez ammanizitay taybay gaanggii gaanggii qiteeza; qeesitayppekka gaamitay ammaneeza.

Isixefaanose aykintteeza

⁸ Isxefaanose aadho keehatethayrannee wolqqar kumii as gancce orothibazitannee malabazita udiza.

⁹ Aylletithapp kezizitayis ginttinttiz Ayihude Woosa Keeth asay Qerenappennee Iskinddireppe Kilqepennee Iisiyappe ye7eez pettii pettii asitay denddii Isxifaanosar palameeza.

¹⁰ Zin Isxifaanose odinttitar yez ecetithannee Ayyana untii eqinttodayis danda7ekkaya.

¹¹ Ye wode untii, «Musenannee Xoossa E cazhodar si7eez» giz worddo markkatta denthitheeza.

¹² Yey garkk udii woya gade cimitanee higge asitamaarita ezal afa denthitheeza. Isxifaanosena aykkii Shanggo tiina kanggeeza.

¹³ Ezal afa payideez worddo markkitay, «Yha athay yha Xooss karannee Muse higga mahii mahii cazhiza.

¹⁴ E, «Yhay Naazirete Yesuusa, yha Xooss Kara laalloda; ma Muse nuus inggeez higga laammoda» yeegodar nuunii si7eez» yeegeeza.

¹⁵ Shanggo shiiqol betteez as ubbay Isxifaanose dakkii be7adar e sinay kiitanchcho sino aaziza.

7

Isxifaanose nashsha

¹ Qeesitay halaqay Isxifaanoseko, «Yha mootay tuma?» yeegii oycceeza.

² Isxifaanose, «Ta ishuntho, ta aditayyo, si7oytta! Nu ada Afraame Kaaraane yezodayis yhanigodaypp tiina Masephexoome yezin, bonchcho Xoossay ees qonccii,

³ «Ne gadayppennee ne dabbityapp shaakinttii taanii nena beeziza biitta qitoba» yeegeeza.

⁴ Ye wode Afraame Kaladaawitay biittapp kezii Kaaraane yezodayis qiteeza. E aday yhayqqeezaypp guye Xoossii eza yha biitta yhatti yi yez gada ke7eeza.

⁵ E hara attozin tokay yedhdhiz aqokka Afraames inggekka. Zin na7a ees baa wode Xooss

yha biitta eesinne e sheeshayis laata udii ing-godana qaala geleeza.

⁶ Xoossii Afraameko, «Ne sheeshay hara biitta imathetithar yezoda; ezayid oyddii xeet layth unt-tii aylletitha haarinttoda.

⁷ Zin taanii ne sheesha moodiz gadayil afa pird-doda. Yeypp guye, untii ye biittaypp kezii yhay-dda taas goynnoda» yeegeeza.

⁸ Xoossii Afraame sheeshay dookalinttoday garkk ezar caaqqin, Isaaqa yelintteez hosppuntha gallasar dookaleeza. Isaaqa Yayqqooba dookaleeza; ma Yayqqooba taphpho nam77ii fa na7ita, nu aditay mayzita dookaleeza.

⁹ «Yayqqooba na7itay Yooseefana qinaatii Gibxxe biitta aylletithis bayizeeza, zin Xoossii ezar yeza.

¹⁰ Eza, e waaye ubbaypp kesseeza. Gibxxe kaat Paarona tiina deettennee ecetith ees inggeeza. Gibxxe kaatay Yooseefas Gibxxe biittannee fa kara ubba aqisod halaqatithi inggeeza.

¹¹ «Gibxxe biittayidannee Kan7aane gade ubbayid naye gelii gaame asa un77itheeza. Ye wode nu mayzitay katha denggodayis danda7ibe7ekkaya.

¹² Yayqqooba Gibxxe biittayid katha yezana si7ii nu aditay tiina ged eza dakkeeza.

¹³ Nam7inth yhamayir Yoosef fa ishitayis fana erseeza. Gibxxe kaat Faarona Yooseefa sheeshay ereeza.

7:5 Medhe. 12:7; 13:15; 15:18; 17:8 **7:7** Kes. 3:12 **7:8** Medhe. 17:10-14; 21:2-4; 25:26; 29:31-35 **7:9** Medhe. 37:11, 28; 39:2, 21
7:10 Medhe. 41:39-41 **7:13** Medhe. 45:1, 16

14 Yooseefa fa ade Yayqqoobannee fa dabbo ubba, laappun tamann ichchin asay faako ye7oday garkk kiittii ki7iseeza.

15 Yayqqooba Gibxxe biitta wodhdheeza; eenne e na7itay ezayid yhayqqeeza.

16 U meqetha ye aqaypp Seekeeme tookinttii yhanigii, ezayid Afraame Hamoore na7itaypp gaam birar wongeez duufayid moogeeza.

17 «Zin Xoossay Afraames inggod geeza poliza layth hellodayis helleez wode Gibxxe biittayid yez nu asay gaanggii gaanggii qiteeza.

18 Yeypp guye, Yooseefa eroowa hara kaat Gibxxe biittayid kawutod hellodayisii.

19 Ye kaatay nu zeritha genii xiqqa na7itay yhayqqoday garkk untan bale kessii oloday garkk nu adita un77itheeza.

20 «Ye wode Muse yelintteez; E Xooss tiina usa lo77o na7a. Fa aday kara hayidzii agina hellodayis dicceeza.

21 Muse wora gaddeez wode Gibxxe kaatay na7ita denggii ekkii fa na7a udii eza dichcheeza.

22 Muse Gibxxitay ecetith ubba taamarii odarannee oosor mino as maaqqeeza.

23 «Muses laythay oyttam kumeez wode fa ishita, Isra7eelita be7adayis fa wozinayid qoppeeza.

24 Isra7eelitaypp pettaya Gibxxe as pettay qo-hodar bi7ii ye Isreele atha maaddii, ye qoheeze Gibxxe atha wodhii kushe maheeza.

7:14 Medhe. 45:9-10, 17-18; 46:27 7:15 Medhe. 46:1-7; 49:33

7:16 Medhe. 23:3-16; 33:19; 50:7-13; Iyya. 24:32 7:17 Kes. 1:7-8

7:20 Kes. 1:10-11, 22 7:21 Kes. 2:2 7:22 Kes. 2:3-10 7:24

Kes. 2:11-15

²⁵ Muse fa ishita fa baggar Xoossii ashshodayis hanizana untii akaakoda gi qoppeeza, zin untii akaakekka.

²⁶ «Wonttitha gallas nam77ii Isreele asitay pettay pettayir yhadhintodar denggeeza untan dab-bosodayis kezii, «Asuntho, yi ishita; abis pettay petta qohine?» yeegeeza.

²⁷ «Zin pettay fa lagga qohizay Museko, «Nena nuul afa haarizannee daynna ootheezay oonoo?

²⁸ Neenii ziqin Gibxxe atha wodheezezay garkk tana wodhodayis koyinee?» yeeгии Musena urqqii dakkeeza.

²⁹ Muse yeya si7ii Gibxxepp bettii Miidaame biitta bete as maaqqii yezitar nam7i dhirith na7ita yeleeza.

³⁰ «Goda kiitanchchay oyttam laythapp guye Si-inna amba kale yez liizho tushe gancce eexiza tama laco gancce Muses bentteeza.

³¹ Muse fa be7eezayid malabaz gi, loythii be7adayis tusheko shiiqii yezin, Goda qaalar,

³² «Taanii ne aditay, Afraame Xooss, Isaaqa Xooss, Yayqqooba Xooss» yeegttar Museko ye7eez. Muse yashshar kukkurii be7adayis danda7ekka.

³³ «Goday Museko, «Neenii eqqeez biittay geeshshi maaqqeez gishos ne tokayid yez caamma kessoba.

³⁴ Taanii Gibxxe yez ta asay un77intta be7eeza. U uufa si7ii untan ashshodayis wodhdheeza. Yhatti yhana! Taanii nena Gibxxe kiittoda» yeegeeza.

³⁵ «Isreelitay Muse, «Nena nuna haarizannee daynna ootheezay oonoo?» yeeгии ixxeeza ye

muse tushe gancce ees bentteez kiitanchchay baggar haarizannee ashshiza udii Xooss azazeenza.

³⁶ Ye Muse Isra7eelita Gibxxe biittayir zoqo Abbannee liizho biittar oyttam layth malabazitannee orothabazita oothitar untan kaalith keseeza.

³⁷ «Isreele asayiko, «Xoossii tana dentheezay garkk yi sheeshay ganccepp ta garkk nabe yinttis denthoda» yeegeezay yha Muse.

³⁸ Liizho biitta shiiqeez Isreele asayira yezeezay, nu aditayirannee Siinna ambal afa ees odeez kiitanchchayira yezeez. Ye Muse de7o qaala nuus inggodayis ekkeeza.

³⁹ «Zin nu mayzitay Muses azazinttodayis koyekkaya; eza ixixii guye Gibxxe maaqqodayis amotteza.

⁴⁰ Ma Aaroonako, «Nuna kaalithiza Xoossita nuus oothoba. Abis giiko, yhayi nuna Gibxxepp ke7eez Muse, wayeezako nuunii erooya» yeegeeza.

⁴¹ Ye wode ooggonaa aaziz eeqa ootheeza. Ye eeqayis yarshsho yarshsheez fa kusher ootheez oosayir ufaytteza.

⁴² Zin Xoossii untis zokko maheeza. Unttii salo xoolinttita goynnoday garkk untan ashshii ashsheeza. Nabitay maxaafayid,

«Isreele asitayyo, oyttam layth kunth

liizho biitta shukkeez mehennee

yarshsheez yarshsha taas yarshsheenenee?

⁴³ Yi, yinttis goynnodayis kochcheez eeqanne Mooloke dunkkaana

7:35 Kes. 2:14 **7:36** Kes. 7:5; 14:21; Tay. 14:33 **7:37** Nam7i.

18:15, 18 **7:38** Kes. 19:1–20:17; Nam7i. 5:1-33 **7:40** Kes. 32:1

7:41 Kes. 32:2-6 **7:42** Amo. 5:25-27

Refana giz yi Xoossa xoolintto misila took-
keeza.

Taanii yinttan Baabiloonepp

seko bagga dakkoda gintinttii xaafintteeza.

⁴⁴ «Nu aditayis liizho biitta markka dunkkaanay
yeza. Ezakka Xoossii Muse kiitteezannee e
beezeezay garkk ootheeza.

⁴⁵ Ma nu aditay ye dunkkaana fa aditaypp ekkii
Xooss tiina bayi7itheez Ayihude maaqqekka asay
biitta aykkeez wode Iyyaasur woli ekkii geleeza.
Ye dunkkaanay Dawute wode hellodayiskka ye
gadayid yezeeza.

⁴⁶ Dawute Xoossar sabintteeza. Ma Yayqqooba
Xoossayis keeth keexxodayis Xoossa woosseeza.

⁴⁷ Zin ees keeth keexxeezay Solomone.

⁴⁸ «Hano zin, Ubbaypp afa Xoossay asii keexxeez
keetha yezooya. Nabe geezay garkk,

⁴⁹ ««Salo ta zufaane,

sa7aykka ta tokay yedhdhiz aqo.

Yeezin, taas yi ab garkk keeth keexxode?

woy taanii shemppiza aqay aba yenee?

⁵⁰ Yha ubba ootheezay ta kushe baasa?»

yeegiza Goday.

⁵¹ «Yi wayizii si7oowa aso? Yi wozinay Xooss
qaala ekkodayis abis ixxeenee? Yi hayay abis
tuleenee? Yi, yi aditaykka uba wode Geeshsha
Ayyanara eqinttiza.

⁵² Nabitay ganccepp yi aditay bayi7eezay
oonoo? Xillay ye7odana tiinatii odeezana
wodheeza. Yhatti yi eza aathii inggii wodheeza.

7:44 Kes. 25:9, 40 **7:45** Iyya. 3:14-17 **7:46** 2 Sam. 7:1-16; 1
Zeena. 17:1-14 **7:47** 1 Kaat. 6:1-38; 2 Zeena. 3:1-17 **7:49** Isa.
66:1-2 **7:52** Isa. 63:10

⁵³ Yi kiitanchcha kushepp Xooss higga ekkeeza, zin kiitinttekkaya» yeegeeza.

Isxifaanose shuchchar cadintteeza

⁵⁴ Unttii yeya si7eez wode fa wozinayid Isxifaanosel afa gaame yilottii, fa achch dhaqii mand-deeza.

⁵⁵ Zin Isxifaanose Geeshsha Ayyanar kumii, salo udee bi7ii, Xooss bonchchonnee Yesuusa Xooss ushachch baggar eqqeezana be7eeza.

⁵⁶ «Yeezako, taanii salo dooyinttin, As Na7ay, Xoossa ushachcha eqqeeza be7eeza» yeegeeza.

⁵⁷ Qaala dhoqq udii ukkittar, fa haya tucii wola eeko woxxeeza

⁵⁸ Eza katamaypp gaxa kessii, shuchchar cad-deeza. Markkattii fa ma7a pettii Saa7oola giz na7atithay kale gaddeenza.

⁵⁹ Isxifaanose, «Ta Goda Yesuusa, ta shemppa ekkoba» yeegii xeegodar untii eza shuchchar cadeenza.

⁶⁰ Bunqittii, fa qaala dhoqq udii, «Ta Godayyo, yha nagara unttis atto goba» yeegeeza. Yey geezapp maaqqii yhayqqeeza.

8

Saa7oola ammaniza asa bayi7eeza

¹ Saa7oola Isxifaanose yhayiqayid ma7intteeza. Ye gallas Yerusalaame yez woosa keetha gita bayi7ith denddeenza. Hawaaritay attin ammaniz-itay ubbay Yihuda biittannee Samaare biitta laal-intteeza.

² Pettii pettii Xooss asitay Isxifaanose moogeeza; ma ees iita yeekkeza.

³ Zin Saa7oola woosa keeth dhabisodayis koyiza. Kara kara yuuyii gelii, ammaniza dhiirathitannee maachchita goochchii goochchii kessii achch kara gelsseeza.

Wonggilay Samaare sabbakintteeza

⁴ Laalintteez ammanizitay yhanigeez aqo ubbayid qaala odeeza.

⁵ Filphoosa Samaare katama yhanigii Kiristtoosa bagga asayis odeeza.

⁶ Gaame asay Filphoosa geeza si7eez wodennee E oothiza malabazita be7eez wode eza akaakii si7eeza.

⁷ Tuna ayyanitay uukkii gaame asaypp kezeeza; ma gaame gundditaynnee wobbitay bili7intteeza.

⁸ Ye katamayid yez asay gaame ufaytteeza.

⁹ Zin Simoona giz pettii athay ye katamitte yeza. E, «Taani gita gita asi» gi Samaare asa kaayor yhay malabaziyegisittar gam7eeza.

¹⁰ Xiqqapp aykkii damma hellodayis yez as ubbay, «Damma Xoossa wolqqay yhaya» gi eza si7eeza.

¹¹ Gaame wodepp aykkii kaayor Samaare asa malabaz giseez gishos asay eza si7eeza.

¹² Zin Filphoosa Xoossa kaatetithannee Yesuus Kiristtoosa sunthibagga dhiirathitayisnne maachchitayis odin, untii ebaz ammanii xammaqintteeza.

¹³ Ma Simoonakka ammanii xammaqinttii Filphoosara wola yhanigii be7eezi baz ubbayidannee oosintteez gita malatita bi7ii malabaz geeza.

¹⁴ Yerusalaame yez hawaaritay Samaare asay Xooss qaala ekkeeza si7ii Phixiroosannee Waannisa untiko dakkeeza.

¹⁵ Phixiroosannee Waannisa yhanigii, ammanizitay Geeshsha Ayyana ekkodaygarkk untis Xoossa woosseeza.

¹⁶ Abis giiko, Samaare asitay Goda Yesuusa sunthar aadda xammaqintteeneppe attin untapp pettayil afakka Geeshsha Ayyana haga wodhdheekka.

¹⁷ Ye wode Phixiroosannee Waannisa fa kushe untal afa gaddin, untii Geeshsha Ayyana ekkeeza.

¹⁸ Hawaaritay fa kushe untal afa gaddin, untis Geeshsha Ayyanay inggintteeza Simoonaa be7eez wode Phixiroosasannee Waannisas miishe ki7ii,

¹⁹ «Taanikka ta kushe gaddeez ubbay Geeshsha Ayyana ekkoday garkk yha mawute taasikka inggoytte» yeegeeza.

²⁰ Zin Phixiroosa eeko, «Neenii Xooss imota miisher woonggodayis qoppeezay gishos ne miishitir nena ekkii dhabo.

²¹ Ne wozinay Xooss tiina luulo maaqqekka gishos nees yhaydda shago woy qaada baaya.

²² Yikkee, yha ne wozina iitatithay gishos nagaraypp maaqqoba. Ne wozina yez iita qofa Xoossii atto goday garkk Goda woossoba.

²³ Ne iita camo qinaaterannee nagara achcha yezaya taanii bi7iza» yeegeeza.

²⁴ Simoonaa mahii, «Yi geezaypp pettakka tana hellaamay garkk taas goda woossoytta» yeegeeza.

²⁵ Phixiroosannee Waannisa markkatteezayppennee Goda qaala odeezaypp guye Yerusalaame maaqqeeza. Samaare yez gaame heera Wonggile odeeza.

Filphoosa Tophphe zhandarbana xammaqeez

²⁶ Goda kiitanchchay Filphoosako, «Denddii sulle baggar Yerusalaamepp Gaaza kanggiza liizho bi-ita ogayko yhanigoba» yeegeeza.

²⁷ Filphoosa denddii qiteeza. Hinddeke giz Tophphe kaatatis I miisha ubba naagiza Tophphe as yeza. Eekka goynnodayis Yerusalaame qiteeza.

²⁸ Gaarel bettii, Yerusalaamepp fa biitta maaqqittar nabe Isiyaasa maxaafe nabbabiza.

²⁹ Geeshsha Ayyanay Filphoosako, «Ye gaarayko yhanigii kale shiiqoba» yeegeeza.

³⁰ Yeezin Filphoosa woxxi yhanigii hellodar zhandarbay nabe Isiyaasa maxaafe nabbabodar si7ii, «Ne nabbabizay nees gelinee?» yeegeeza.

³¹ Zhandarbay, «Tana tamarisiza as baazin way-izii gelode?» yeegeeza. Gaarel kezii bettoday garkk Filphoosa woosseeza.

³² Zhandarbay nabbabiza maxaafay kifilay yhaya,

«E dur garkk shukinttodayis laagintteeza;

Duri na7a fa ikisa meedizitay tiina si77i gizay garkk,

eekka fa doona dooyekkaya.

³³ E kawuzheeza; ees geeshsh pirddakka dhabeeza.

E yessay yha sa7aypp gachintteez gishos e sheeshibagga oonoo ododay?» yeegiza.

³⁴ Zhandarbay mahii Filphoosako, «Nabe obaz odee? Fa bagga odinenee hara asibaz odee? Taas odooye» yeegeeza.

³⁵ Filphoosa mahii, Xooss qaala ye aqaypp aykkii, Yesuusa bagga odiza Wonggile ees odeeza.

³⁶ Unttii yhanigttar haathii yeza aqo helleeza. Zhandarbay, «Haathe yhaya bo7oba; ta xam-maqinttamay garkk abi kaye?» yeegeeza.

³⁷*Filphoosa eeko, «Neenii ne kunith wozinaypp ammaniko danda7iza» yeegeeza.

E mahii, «Yesuus Kiristtoos Xoossa Na7a maaqqeezana taanii ammaniza» yeegeeza.

³⁸ Gaaray eqqod garkk zhandarbay kiittin, nam7ay wodhdhii haatha geleeza; Filphoosa eza xammaqeeza.

³⁹ Unttii haathapp gaxa kezeezan garkk Goda Ayyanay Filphoosa qoppekkazin ekkeeza. Nam7intha zhandarbay Filphoosa be7ekkaya, zin fa oga ufayttittar qiteeza.

⁴⁰ Filphoosa Azaaxona oleeza. Ma Qisaare ye7oda hellodayis katamitayir yuuyii Wonggile markkatteeza.

9

Saa7oola ammaneeza (Haw. O. 22:6-16; 26:12-18)

¹ Ye wode Saa7oola Goda kaalizita wodhodayis mandditar qeese halaqitayiko yhanigeez.

² Goda oge kaalliza dhiirathitannee maachchita denggiko, accii Yerusalaame ko7odayis, Damasqqo yez Ayihude Woosa Keethitayis dabddaabbe xaafinttoday garkk eza woosseeza.

³ E yhanigii, Damasqqo katama hellodayis ukko-dar, qoppekka salopp wolqqama poo7o e yu-ushayir poo7eeza.

* **8:37** Pettii pettii birana maxaafitay payido 37 yez qopa gujjiza zin binii maxiftay gujjooya

⁴ E sa7a pokkeezazin, «Saa7oola, Saa7oola, abis tana bayithinnee?» giz qaala si7eeza.

⁵ Saa7oola, «Godayyo, ne oonoo?» yeegii oycceez. «Taanii, ne bayi7ith Yesuusa» yeegeeza.

⁶ *Goday eeko, «Denddii katama geloba; ne oothodayis beezizabaza ezayid nees odinttoda» yeegeeza.

⁷ Saa7oolara oge yhanigiz asitay akkokka odinttekka eqqii atteeza. Giirth si7inttiza, zin oonakka benttowa.

⁸ Saa7oola pokkeez aqaypp denddii be7adar e aafay denggaam ixeeza. Yey gishos, untii e kushayid aykkii kaalithii Damasqqo gelseeza.

⁹ Hayidzii gallas hellodayis E be7adayis danda7ekka; akkokka meekkaya; uzhekkaya.

¹⁰ Damasqqo pettii Hanana giz Yesuusa tamaray yeza. Goday qoncithar, «Hananaa» yeegii xeegeeza.

Hananee mahii, «Ta Godayyo, ta yhaydda yeza» yeegeeza.

¹¹ Goday eeko, «Denddii luulo ginttinttiz oge yhanigii, Yihuda kara Saa7oola giz xersesepp ye7eez woos woossiz atha koyoba.

¹² Ma Hanana ginttiz athay gelii, Saa7oola nam7intho be7aday garkk fa kushe ezal afa gad-dodar qoncithar be7eeza» yeegeeza.

¹³ Hanana mahii, «Godayyo, Yerusalaame ne geeshsh asayil afa ye athay ab garkk iita baz ootheezako taanii gaame asaypp si7eeza.

* **9:6** Pettii pettii maxaapitay kukkuritaranee malabaz giitara yeegizanno gujjiza

14 Ma Damasqqo ne suntha xeegezita ubba accodayis, qeese halaqitay ees mawute inggeeza» yeegeeza.

15 Zin Goday eeko, «Saa7oola Ayihude maaqqekka asay tiina, kaatitay tiinannee Isreele asay tiina, ta suntha ersodayisnee taas oothoayis maraxintteez miisha maaqqeez gishos ne eeko yhanigoba.

16 Abis giiko, ta sunthay gishos E waafa waaye ekkodayis beezizako taanii eza beezoda» yeegeeza.

17 Hananee yhanigii, kara gelii, fa kushe Saa7oolal afa gaddii, «Ta isha Saa7oola, ne ye7eez ogayil nees bentteez Goda Yesuusa, ne be7aday garkennee Geeshsha Ayyanar kumoday garkk tana azazeeza» yeegeeza.

18 Ellisii, Saa7oola aafaypp pettii puqo garkkez-ibazay wodhdhin, Saa7oola nam7intho be7eeza. Ma denddii xammaqintteeza.

19 Katha mi miinggeeza, Damasqqo yez amman-izitayir xiqqa gallas gam7eeza.

Saa7oola Damasqqo taamarsseeza

20 Ellisii Saa7oola, «Yesuusa Xooss Na7a» yeegii Damasqqo yez Ayihude Woosa Keethitayid qaala taamarsseeza.

21 Yeya si7eez ubbay malabaz gi, «Yhay Yerusalaame Yesuusa suntha xeegezita dhabisiza baasannee? Ma yhana ye7eezay untan accii, qeese halaqitay tiina kanggodayis baasannee?» yeegeeza.

22 Zin Saa7oola qaala odor minggittar minggittar yhanigeeza. Yesuusa, E Kiristtoosa

maaqqeezana milxxi udii odeez gishos Damasqqo yez Ayihuditay ees mahodibaz dhabeeza.

²³ Gaame gallasapp guye Ayihuditay shiiqii, Saa7oola wodhodayis tobbeeza.

²⁴ Zin Ayihuditay fana wodhodayis qoppeeza Saa7oola si7eeza. Unttii eza wodhodayis qammannee gallas katama penge naagiza.

²⁵ Zin e tamaritay eza qamma kanggii, gimbbe gase lukor daachchora wodhiseeza.

Saa7oola Yerusalaame taamarsseeza

²⁶ Saa7oola Yerusalaame helleez wode ammanizitayir walakinttodayis koyeeza. Zin E Kiristoosa ammaneezay unttis tuma aazam ixxin ees yashitteeza.

²⁷ Zin Barnnabaasa Saa7oola hawaaritayko kanggeez. Ogel Goday wayizii qonccceezakonnee nashsheezako, ma Saa7oola Damasqqo Yesuusa sunthayir yashittekka wayizii qaala odeezako unttis geeshshii odeeza.

²⁸ Saa7oola Yerusalaame wutii Goday sunthayir yashittekka qaala odittar, hawaaritayira wolla yeza.

²⁹ Ma Saa7oola Girike qaala odeez Ayihuditayra odinttitar palamiza. Zin unttii eza wodhodayis koyeeza.

³⁰ Ammaniza asitay yeya si7ii, Saa7oola Qisaare kanggii Tersese dakkeenza.

³¹ Yihuda, Galilarannee Samaare ubbayid yez woosa keethitay saror yezeeza. Ma miinggeenza; Godayis yashittittar Geeshsha Ayyana minthathor gaanggii gaanggii yhanigeeza.

Phixiroosa Liidarannee Yoophphe taamarsseeza

³² Phixiroosa gade ubba yuuyttar Liida yez ammaniza asitayko helleeza.

³³ Ezayid hosppun layth muda sili arssal woyi7ii yez Eeniya giz atha denggeeza.

³⁴ Phixiroosa, «Eeniya, Yesuus Kiristtoosa nena pathiza; denddii ne hiixa denthoba» yeegeeza. Eekka ellisii denddii eqqeeza.

³⁵ Liidarannee Saarona yez as ubbay Eeniya bi7ii, Godayiko maaqqeeza.

³⁶ Yoophphe katama pettii Xaabito ginttiz ammaniza asita yeza. (Xaabito guussay gen7e guussii) Iza fa yeza wode ubbayid lo77o baz oothitarannee manqqita maaddittar yezeeza.

³⁷ Ye wode iza hargginttii yhayqqin, asay I aha meeccii, pooqeel afa kessii woyitheeza.

³⁸ Liida Yoophphes kale yeza. Ammanizitay Phixiroosa Liida yeza si7ii, «Hayyana nuuko ellisii ye7oba» yeegiz kiita nam77ii asita eeko azazeeza.

³⁹ Yey gishos, Phixiroosa denddii, untara yhanigeeza. Hellii, pooqeel afa yez kifile eza gelseeza. Am7itay Phixiroosa kalayir eqqii yeekkittar Dorqqa untara paxa yezar oothiez qamisitannee aflita ubba Phixiroosa beezeeza.

⁴⁰ Phixiroosa untan ubba bale kessii, gulbatii Xoossa woosseeza. Ma ahayko maaqqii, «Xaabite, denddoba» yeegeeza. Xaabita fa aafa dooyii Phixiroosa bi7ii, denddii betteeza.

⁴¹ Phixiroosa izo fa kusher maaddii denthii esseeza. Yeypp guye, ammanizitannee ami7ta xeegii, denddeezano u tiina ke7eeza.

⁴² Yha oday Yoophphe katama ubba helleeza. Gaame asay Goda ammaneeza.

⁴³ Phixiroosa Yoophphe Simoona giz degelay kara unddenna gallas gam7eeza.

10

Phixiroosarannee Qornnelosara

¹ Qisaare, «Xaale ola asitay cuga» ginttinttiz ola asitay gancce pettii Qorinelosaa ginttinttiz mato halaqay yeza.

² Qorinelosaa fa kara asayira Xoossa miinthii ammaniza asinnee Xoossa goynniza as. Ayihude manqqitakka gaame maaddiza, ma Xoossa ubba wode woossiza.

³ Pettii gallas uddufun saate heera Xooss kiitanchchay eeko yi7ii, «Qornnelosaa» gi xee godar E qoncithar geeshshii be7eeza.

⁴ Qorinelosaa dagammii kiitanchcha toli udii bi7ii, «Godayyo, abba?» yeegeeza.

Kiitanchchay mahii, «Ne woosannee manqqita ne maaddizay Xooss tiina qofintteeza.

⁵ Yhatti Yoophphe as kiittii, Phixiroosa giz Simoona ki7isoba.

⁶ Phixiroosa abba kaler degela Simoona kara imathetithi betteeza» yeegeeza.

⁷ Qorinelosaa paas odeez kiitanchchay yhanigin, fa ayllitaypp nam7itannee Xooss goynniza fa kale wotaaddaritaypp petta xeezii,

⁸ Unttis ubba baz odii Yoophphe azazeeza.

⁹ Wonttitha gallas untii yhanigii, Yoophphe katama ukkodar usuppun saate heera Xooss woossodayis Phixiroosa pooqeel afa kezeeza.

¹⁰ E nayinttii kath maadayis koyeez, zin katha kaxxodar E ahumo be7eeza.

¹¹ Salo dooyinttin, damma afla aazizabaz oyddii baggar aykkinttii wodhdhodar E be7eeza.

¹² Ezayid oyddii toker yez mehitay, wora do7ita, ulora goochinttiza medhetithaynnee salo kafita ubbay yeza.

¹³ Ye wode «Phixiroosa, denddii eqqii shukkii mooba» giz qaala eeko ye7eez.

¹⁴ Zin Phixiroosa, «Godayyo, wa77a! Ta tuna baz ubbarakka mi eroowa» yeegeeza.

¹⁵ Ma, «Xoossay geeshsheeza neenii tuna giipe» giz qaala nam7intho eeko ye7eez.

¹⁶ Yeykka, hayidzii toke haneezaypp guye ye gita afla aazizay ellisii udee salo ekintteeza.

¹⁷ Phixiroosa fa be7eez qoncithayis bili7ithay, «Ab maaqqadeshsha?» gi fa wozinar qoppodar, Qorineloosa kiitteez asitay Simoona kara oyicichi denggi baler eqqeeza.

¹⁸ Fa qaala u dhoqq udii, «Phixiroosa gintiz Simoona imathay yhaydda yenee?» yeegii oyceeza.

¹⁹ Phixiroosa qoncithar be7eezi baza qopithal afa yezin, Geeshsha Ayyana eeko, «Yeezako, hayidzii asitay nena koyiza.

²⁰ Denddii wodhdhoba, taanii untan kiitteez gishos se7ekka untar yhanigoba» yeegeeza.

²¹ Phixiroosa asitayko wodhdhii, «Yi koyizay tanannee; yi abis ye7eenee?» yeegeeza.

²² Unttii mahii, «Nuna mato halaqay Qorineloosa azazeeza. E geeshsh, Xoossa goynniza asinnee Ayihude as ubbayid gaame bonchchintteez as. Qorineloosa, nena fa kara kanggi qaala nepp

si7oday garkk geeshsha kiitanchchay ees odeeza» yeegeeza.

²³ Phixiroosa asita kara gelssii mokkeeza.

Wonttitha gallas, denddii untara qiteeza. Yoophphe katama yez ammanizitaypp pettay pettay ezar wolla yhanigeeza.

²⁴ Wonttitha gallas, Qisaare helleeza. Qorineloosa fa iginttannee fa laggita pettipp xeezii shiishii, Phixiroosa naagiza.

²⁵ Phixiroosa kara gelod hanodar, Qorineloosa eza hellii e tiina xuggunii ees goynnodayis koy-eeza.

²⁶ Zin Phixiroosa, «Denddoba, taakka ta ommas ne garkk as» yeezii eza dentheeza.

²⁷ Phixiroosa Qornneloosar odeintinttar kara gelodar gaamay asay shiiqeeza denggeeza.

²⁸ E asayiko, «Ayihude as hara gader pettipodayis woy woli hellodayis woga baza yi eriza. Zin taanii oonakka tuna woy geeshshi baaya gaamay garkk Xooss tana beezeeza.

²⁹ Yey gishos, yi taako kiittin ixo bayth ye7eeza. Yhatti tana abis xeegiseezako taas odoytta» yeegeeza.

³⁰ Qorineloosa, «Taanii yhayino oyddii gallasapp tiina yhannontte uddufun saate woosa woosodar, phooliz ma7o ma77eez as ta tiina eqqeeza.

³¹ E taako, «Qorineloosa, Xoossii ne woosa si7eeza, neenii manqqita maaddeezanakka qoppeeza.

³² Yikkee, as Yoophphe kiittii, Simoon Phixiroosa giza xeegisoba. E, Simoon giz degela athay kara aba doonar betteeza» yeegeeza.

³³ Yey gishos, taanii neeko ellisii kiiteeza; ne yi7ithayir lo77o ootheeza. Yikkee, Xoossii nena

Kiitteezibaz ubba si7odayis yhatti nuunii ubbay yhaydda Goday tiina yeza» yeegeeza.

Phixiroosa nashsha

³⁴ Kaallikka, Phixiroosa, «Xoossii as sino bi7ii asapp ase shaakkooya.

³⁵ Zini duma duma biitta as ubba oona maaqqikokka paas yashittizannee xillo ooso oothizayid Xoossii ufayttiza taanii tuma akaakeeza.

³⁶ Xoossay, ubba Goda maaqqeez Yesuus Kiristoosa baggar sarotith odittar yha Wonggila Isreele asayis azazeeza yi eriza.

³⁷ Waannisa xinqqatebagga sabbakeezaypp aykkii Galilapp aykkii Yihuda biita ubba hellodayis haneezibaza yi eriza.

³⁸ Xoossii Naazirete Yesuusana Geesha Ayyanar tizheezannee wolqqa inggeeza. Xoossii eza yez gishos lo77o baz oothittar harggintteezita pathitarannee Xalahe kushe haarintteez ubba kessittar yuuyeeza.

³⁹ «Ayihude biittannee Yerusalaame E oothiez ubba bazayis nuunii markkitta. Unttii mazqalel afa sottii eza wodheeza.

⁴⁰ Zin Xoossii hayidzintha gallas yhayiqopp eza denthii asayis benttoday garkk udeeza.

⁴¹ Ye benttithay Xooss tiina maraxeez ees markka maaqqeez nuus markkatizapp attin as ubbayis baaya. E yhayiqopp denddeezaypp guye nuur meezannee uzheeza.

⁴² Nuunii Wonggile asayis ododay garkkennee paxa yezital afannee yhayqqeezitatayil afa pirdodayis Xoossii shuumeezay Yesuusa maaqqeezana markkattoday garkk nuna azazeeza.

⁴³ Xooss ammaniza ubbay nagaray, e sunthayir atto ginttinttiza nabitay markkatiza» yeegeeza.

Ayihude maaqqekka asitay ammanii Geeshsha Ayyana ekkeeza

⁴⁴ Phixiroosa haga oda haasekkazin qaala si7odar ubbayil afa Geeshsha Ayyana goggeeza.

⁴⁵ Phixiroosar Yoophphepp ye7eez ammaniza dookalintteez Ayihude ubbay, Ayihude baazitalakka Geeshsha Ayyana goggez gishos malabaz geeza.

⁴⁶ Yeya godayis danda7eeza, untii duma duma doonar nashshittarannee Xoossa galatodar si7eez gishosi.

Ye wode Phixiroosa mahii,

⁴⁷ «Yeyititay ma nugarkk Geeshsha Ayyana ekkeezitay haathar xammaqinttamay garkk kayoday danda7izay oonoo?» yeegeeza.

⁴⁸ Untii Yesuus Kiristtoosa sunthayir xammaqinttoday garkk untan azazeeza. Yeypp guye, untii paar xiqqa gallas bettoday garkk Phixiroosana woosseeza.

11

Phixiroosa fa ootheezibaza Yerusalaame woosa keethis odeeza

¹ Hawaaritayinnee Yihuda yez ammanizitay, Ayihude baazitaykka Xoossa qaala ekkeeza si7eeza.

² Phixiroosa Yerusalaame yhanigeez wode dookalintteez ammanizitay,

³ eeko, «Nenii dookalinttekkazityiko gelii untara katha abis meenee?» yeezii falameeza.

⁴ Zin Phixiroosa haneezibaz tiinapp aykkii maarar odeeza:

⁵ «Taanii Yoophphe katama Xooss woossittar ajuuta be7eeza. Damma afile aazizabaz oyddii baggar aykkinttii salopp wodhdhittar taako ye7eez.

⁶ Taanii dakkii be7adar oyddii toker yez mehita, wora do7ita, ulora goochinttiza medhetithitannee salo kafita be7eeza.

⁷ «Phixiroosa, denddoba, shukkii mooba» giz qaala si7eeza.

⁸ «Zini taanii, «Godayyo, wa77a, tuna baz woy geezhekkabaz ubbarakka ta doonako helii erooya» yeegeeza.

⁹ ««Xoossay geeshsheeza neenii tuna giipe» yee-giz qaala nam7intho salopp ye7eez.

¹⁰ «Yey hayidzii toke haneza, mahii ubbay salo fud ekintteeza.

¹¹ Ye saatatekka hayidzii asitay Qisaarepp taako kiitinttii taanii yez kara helleeza.

¹² Sidhekkazar untara yhammadaygarkk Ayyana taas odeeza. Ma yha usuppun ishitya Yoophphepp taara Qisaare yhanigeezityayir Qorinelooza kara geleeza.

¹³ Kiitanchchay e kara gancce eqqii, «Yoophphe kiittii Phixiroosa ginttinttiz Simoonaa xeejisoba.

¹⁴ Nenannee ne kara as ubba ashshiza qaala E nees ododa» geezana Qorinelooza nuus odeeza.

15 «Taani nashsha aykkodar Geeshsha Ayyana tiin nuul afa wodhdheezeay garkk untal afakka wodhdheeza.

16 Ye wode «Waannisa haathar xammaqeeza, zin yi Geeshsha Ayyanar xammaqintoda» yeegeez Goda qaalay taas qopintteeza.

17 Xoossay nuus Goda Yesuus Kiristtoosa amaneezitayis inggeez imota izo Ayihude baazitayisikka inggiko, yeezin Xoossa kayodayis taanii oonoo?» yeegeeza.

18 Unttii yeya si7eez wode fa palama ashshii, «Yeya maaqqiko, Xoossay Ayihude baazitayikka nagarapp maaqqii de7o yezoday garkk maaroteth inggeeza» yeegii Xooss galateeza.

Anxooka woosa keeth

19 Isxefaanoosana yhayiqos heltheez bay7ithaypp denddeezayid laalintteez ammanizitay qaala Ayihuditay aaddas odittar pingqe, Qoophiroosannee Anxooka hellodayis yuuyeeza.

20 Zin Qoophiroosappennee Qerenapp ye7eez pettii pettii ammaniza asitay Anxooka yhanigii, Goda Yesuusa Wonggile Girike asayiskka odeeza.

21 Goda wolqqay untara yeza; ma gaame asay ammanii Godayikko maaqqeeza.

22 Ye oda Yerusalaame yez woosa keethay si7eez gishos Barnnabaasana Anxooka azazeeza.

23 Barnnabaasa Anxooka yhanigeez wode Xoos-sii fa aadho kehetithaypp fa woyayis wayizii inggeezako bi7ii ufaytteeza. Unttii ubbay fa kunth

wozinar Godayil miinggii yezoday garkk untan zoreezay:

²⁴ Barnnabaasa Geesha Ayyanarannee ammanor kumeez keeha as maaqqeez gishosii. Gaame asaykka Goda ammaneeza.

²⁵ Yeypp guye, Barnnabaasa Saa7oola koyodayis Xerseeze qiteeza.

²⁶ Ezayid Saa7oola denggii Anxooka ekkii ye7eeza. Barnnabaasaanee Saa7oola woosa keetha asayira laythi muda bettii gaame asa taamarsseeza. Ammanizitay Anxooka «Kirsttaane» ginttinttii tiina xeeqintteeza.

²⁷ Ye wode pettii pettii nabitay Yerusalaamepp Anxooka wodhdheeza.

²⁸ U ganccepp Agaboosa gizay denddii gade ubbayil iita naye dendodana Ayyana wolqqar tinbbite odeeza. Yeyi haneezay Oroome Kaatay Qalawudoosa wodaydda.

²⁹ Ammanizitay ommar ommar fa wolqqay garkk miishe kessii Yihuda yez ammanizitayis maadee dakkodayis qofa acceeza.

³⁰ Unttii yey garkk udii, miisha Barnnabaasalanee Saa7oolal woosa keeth cimitayis dakkeeza.

12

Woosa keethal afa dendeex wolqqama bayi7ithii

¹ Ye wode Kaatay Herodoosa* woosa keeth asaypp bagga bayithi aykkeeza.

^{11:28} Haw. O. 21:10 * ^{12:1} Kaatay Herodoosa: Yhay kaatay Herodos, damma Herodoosa Agripha gizay E, 37-44 Maarotitha Laytha hellodayis haareeza. E kaat Heroodosas na7a na7a

² Waannisa isha Yayqqooba mashshar wodhiseeza.

³ Yey Ayihudita ufaysseezana bi7ii, gujjii Phixiroosanakka aytheeza. Yey haneezay boora Baale bonchchiza gallasitayida.

⁴ Phixiroosana aykkii acceeza. Paaziqa bonchchiza gallasitaypp guye woya tiina eza kessodayis qoppii, oyddii oyddii wotaaddaritay oyddii aqo naagizitay eza naagoday garkk aathii inggeeza.

⁵ Yey gishos, Phixiroosa achch kara naaginttiza. Zin woosa keeth asay ees miinthii Xooss woossiza.

Kiitanchchay Phixiroosana achch karapp kesseeza

⁶ Herodoosa Phixiroosana woya tiina shiishodaypp tiina qamma Phixiroosa nam7i baggar nam7ii wotaaddaritay gancce santhalaater acinttii gentteeza. Naagizitay achch karay pengitayid eqqii naagiza.

⁷ Qoppekkazin Goda kiitanchchay qoncceeza. Achch karayid poo7o poo7eeza. Kiitanchchay Phixiroosa miyya bochchii barkkithii «Elle denddoba» yeegeeza. Izirakka santhalaatay e kushaypp wodhdheeza.

⁸ Kiitanchchay eeko, «Ne ma7a ma77oba, ne caammakka aathoba» yeegeeza. Phixiroosa yey garkk ootheeza; kiitanchchay, «Ne afar ma77iz ma7a ma77ii tana kaalloba» yeegeeza.

⁹ Phixiroosa achch karapp kezii kiitanchcha kaalleeza. Ees ahumo bi7izay garkk aazizapp attin kiitanchchay oothizabazay tuma aazekkaya.

¹⁰ Kiitanchchayirannee Phixiroosara tiinasanee nam7intho wotaaddara aadhii katama kang-giza biraata pengayiko helleeza. Pengaykka unttis fa aaddas dooyintteeza. Unttii kezii pettii husa ogel kezeezan garkk qoppekkazin kiitanchchay Phixiroosapp shaakintteeza.

¹¹ Phixiroosas wozina maaqqin, «Ta Goday fa kiitanchcha kiittii, Herodoosa kusheppennee naagii betteez Ayihude as ubbaypp ashsheezana yhatti tuma ta ereeza» yeegeeza.

¹² E yeya akaakeez wode gaame asay pettipp shiiqii Xoossa woossiza aqa, Marqqoosa giz Waan-nisa indat Mayramii kara yhanigeeza.

¹³ Ezayid baler eqqii xeegeeza. Pettii Rooda giz ooso asita penga ees dooyodayis ye7eeza.

¹⁴ Rooda Phixiroosa qaala maaqqeezana erii ufayisar kumii gazara dooyoda ashshii guye woxxi yhanigii, «Phixiroosa bale eqqeeza» yeeгии asayis odeeza.

¹⁵ Asay iiko, «Neenii eeyinnee!» yeegeeza. Rooda Phixiroosa maaqqeeza geeshshii odeeza. Unttii, «Yey E kiitanchcha» yeegeeza.

¹⁶ Zin Phixiroosa baler eqqii xeessi ashshaam ixxin asay gazara dooyii eza bi7ii malabaz geeza.

¹⁷ Zin unttii si77i goday garkk Phixiroosa fa kushayir mallii Goday achch keethaypp eza wayizii kesseezako unttis qonccisii odii, «Yhaya Yayqqoobasinnie ammaniza asayis odoytta» gi ezaypp kezii hara aqo qiteeza.

¹⁸ Sa7a wonttodar «Phixiroosa ana qiteenee» gi wotaaddaritay woli gancce gaame walaseeza.

¹⁹ Herodoosa Phixiroosa koyisin, E benttekazay gishos naagizita qurii, untan wodhoday garkk

azazeeza. Yeypp guye, Herodoosa Yihudapp Qisaare wodhdhii ezayid xiqqa wode betteeza.

Herodoosa yhayiqo

²⁰ Herodoosa Xiroosa asayirannee Sidoona asayir wola morkke. Unttii biittay katha Herodoosa biittapp denggiza gishos unttii pettipp maaqqii e zhandarba Bilasxoosa paas cima udii dabbotodayis Heroodosakko yhanigeeza.

²¹ Herodoosa suntheez gallas fa kaatetith afila ma77ii, zufaanaayil afa bettii asayis odeeza.

²² Asay, «Yey Xooss qaala, as qaala baaya» yeegii uukkeeza.

²³ Herodoosa Xoossa bonchchekka gishos izira Goda kiitanchchay eza shocin guxiner minttinttii yhayqqeeza.

²⁴ Zin Xooss qaalay diccittarannee dalggittar kiiteeza.

²⁵ Barnnabaasannee Saa7oola fa oosa polii Marqqoosa giz Waannisa paar ekkii Yerusalaamepp maaqqeeza.

13

Barnnabaasannee Saa7oola kiitintteeza

¹ Anxooka yez woosa keetha nabitayinnee asita-maaritay yeza. Unttii Barnnabaasa, Karith gintintintiz Simoona, Qerenapp ye7eez Lukosa, Kaatay Heroodisara dicceez Minaahennee Saa7oola.

² Unttii Goda goynnitarannee xoomitarannee Geeshsha Ayyanay, «Taanii xeegeez oosayis Barnnabaasannee Saa7oola taas shagoytta» yeegeeza.

³ Yey gishos, untii xoomeezappennee woosseezaypp guye fa kushayid untal afa gaddii woossii dakkeeza.

Barnabaasaanee Saa7oola Qoophiroosa yhanigeeza

⁴ Yey gishos, Geeshsha Ayyana untana azazeeza. Selewuqe yhanigeeza; ezaypp markkabe gelii Qoophiroosa haathar teqintteez biita yhanigeeza.

⁵ Unttii Silmmana hellii Ayihude Woosa Keethitayid Xooss qaala odeeza. Waannisa* maaddittar untar yeza.

⁶ Unttii Qoophiroosa haathar teqintteez biitta kanthii Phaafu heliza wode pettii worddo nabe Bar-Yesuusa giz Ayihude ammita denggeeza.

⁷ Ye ammitay gade aqisiz Sarggosa Phawuloosa giz wozinaama athayira yeza. Sarggosa Phawuloosa Barnabaasanne Saa7oola faako xeggii Xooss qaala si7odayis koyeeza.

⁸ Zin Girike doonar ammitay sunthay «Elimmaasa» bilthay gade haarizay ammanamay garkk kayodayis koyii Barnabaasarannee Phawuloosar eqintteeza.

⁹ Zin Phawuloosa giz Saa7oola Geeshsha Ayyanar kumii ammitana dakkii bi7ii,

¹⁰ «Naati, Xalahe na7ayyo, iitatith ubbay kumeezayo, xillotith ubbayis morkkayo, luule Goda oga mirqiza ashshaamo?

* **13:5** *Waannisa:* Yha aqa xaafintteez Waannisa, hawaare Waannisa baazin Waannisa Marqqoosa gintinttiz Marqqoosa Wonggile xaafeezaya.

¹¹ Yeezako, yhatti Goday kach kushay neell afa yeza. Neenii qooqe maaqqoda; xiqqa wodes awa poo7o be7aamii» yeegeeza.

Izir cagganannee dhuma e aafa goozin, fa kushayid aykkii kaalithiza as koyttar yuuyeeza.

¹² Gade haarizay yeya be7eez wode Godaabaz tamarssizayid malabaz gi ammaneeza.

Barnnabaasannee Phawuloosa Phisida Anxooka yhanigeeza

¹³ Phawuloosannee ezar yezitay Phaafupp denddii, Phinfilä yez Phergge markkaber yhanigeeza. Waannisa untapp shaakinttii Yerusalaame maaqqeeza.

¹⁴ Zin untii Pherggepp aadhii Phisida yez Anxooka helleeza. Maala gallas gallas Ayihude Woosa Keeth gelii betteeza.

¹⁵ Muse higgayid nabitay maxaafay nabbabintteezaypp guye Ayihude Woosa Keeth halaqitay, «Nu ishuntho, as minthathiza qaala yinttis yezako asayis odoytte» yeegii untiko azazeeza.

¹⁶ Phawuloosa denddii eqqii fa kusher mallii, «Isreele asitannee, Xoossa goynniza Ayihude maaqqekka asayyo, si7oytta.

¹⁷ Yha Isreele asa Xoossay, nu mayzita dooreeza. Gibxxe biitta imathatithar untii yezin, untan gaanthii fa gita wolqqar Gibxxe biittapp kesseeza.

¹⁸ Liizho biitta oyttam layth maaqqoda untan danda7eeza.

¹⁹ Kan7aane biitta Ayihude maaqqekka laappun kaatetithita haasii u biitta fa asa laatiseeza.

²⁰ Yeyi ubbay oydd xeetannee ishatam maaqqad layth gancce haneeza. Yeypp guye nabe Sami7eela wode hellodayis daynnitay aqisoday garkk inggeeza.

²¹ «Yeypp guye, untii paas kaat inggoday garkk woossin, Xoossii Biiname sheeshaypp Qiise na7a, Saa7oola oyttam laythi kawutoday garkk untis inggeeza.

²² Xoossay Saa7oola shaareezaypp guye untal afa Dawute kawutiseeza. Xoossay Dawute bagga markkattittar, «Taanii ta shene ubba oothiz ta wozina maaqqeez Issaye na7a Dawute denggeeza» yeegeeza.

²³ «Xoossay, «Taanii Dawute sheeshaypp Isreele ashshiza ko7oda» gi qaala geleezay garkk Yesuusana ke7eeza.

²⁴ Yesuusa ye7odaypp tiina Isreele as ubbay fa nagaraypp maaqqii xammaqinttoday garkk Waannisa qaala odeeza.

²⁵ Ma Waannisa fa oosa wurssod hanittar asayiko, «Tana yi oona gi qoppee? Taanii yi naagiza Kiristtoosa baaya, zin taanii e caamma bilodayis taas beezowazay taapp guyer yi7iza» yeegeeza.

²⁶ «Nu Ishuntho, Afraame sheeshuntho, ma yhaydda Ayihude baazin Xoossis yashittizitayo, yha atotitha qaalay nuus kiitintteeza.

²⁷ Abis giiko, Yerusalaame yez asaynnee u halaqitay Yesuusana erekkaya. Maala gallas ubbayid nabbabinttiza nabitay qaala akaakekka

gishos ezal afa pirdii nabitay odeez qaala poleeza.

²⁸ Yesuusa wodhisodayis pettii sankkekka dhabin Philaaxoosa eza wodhoday garkk woosseeza.

²⁹ Unttii Yesuusabaz Geeshsha Maxaafayid xaafintteezibaz ubba poleez wode mazqalepp eza wodhisii moogeeza[†].

³⁰ Zin Xoossay yhayiqopp Yesuusa dentheeza.

³¹ Yeypp guye, E paar Galilapp Yerusalaame ye7eezitayis unddenna gallas bentteeza. Unttii yhatti ebaz asayis markkatiza.

³² «Xoossii nu aditayis immad geez Wonggile nu-unii yinttis odiza.

³³ Dawute fa Mazmuure Maxaafayid nam7intho shemppayid,

« «Neenii, ta Na7a,

taanii yhayino nena yeleeza»

giintintteezay xaafintteeza Yesuusa, Xoossii yhayiqopp denthii nu mayzitayis inggod geeza nuus u na7itayis poleeza.

³⁴ E wooqqaamay garkk Xoossay yhayiqopp eza denthor erisodayis,

« «Taanii Dawutes inggod geez

ammanintteez geeshsh anjjo yinttis inggoda» yeegii odeeza.

³⁵ Yey gishos, Mazmuure Maxaafayid hara aqo ma «Ne Xillay aha wooqqisaamii yeegiza.»

13:28 Mat. 27:22-23; Mar. 15:13-14; Luq. 23:21-23; Wan. 19:15

[†] **13:29** Moogeezay biitta gance baazin shuchchapp woocintteez duufo gance gaddeez guussii **13:29** Mat. 27:57-61; Mar. 15:42-47; Luq. 23:50-56; Wan. 19:38-42 **13:31** Haw. O. 1:3

13:33 Maz. 2:7 **13:34** Isa. 55:3 **13:35** Maz. 16:10

³⁶ «Dawute fa wode Xoossa qofa poleezaypp guye yhayqqii fa aditayir mooginttii wooqqeeza.

³⁷ Zin Xoossay yhayiqopp dentheezay wooqqekkaya.

³⁸ «Yey gishos, ta ishuntho, nagara atotithay Yesuusa baggar tiinatii yinttis odintteeza eroytta. Muse higgay nagarapp xillisodayis danda7ooya.

³⁹ Zin Yesuusa ammaniza ubbay nagarapp xiliza.

⁴⁰ Yey gishos, nabitay geezay yinttal afa hellamay garkk naaginttoytta.

⁴¹ « «Xoossay geezbaz leeqisizuntho! Bo7oytta! Malabaz goytta! Dhaboytta! oonkka odin, yi ammanoowa oosa taanii yi wode oothoda» » yeegeeza.

⁴² Phawuloosannee Barnnabaasa Ayihude Woosa keethapp kezodar, kaalliza maala gallasayid yeya gujjii ododay garkk asay untan woosseeza.

⁴³ Shiigo laalintteezaypp guye gaame Ayihuditayinnee Ayihuditay ammanayid gelii Xoossa goynniza gaamitay Phawuloosannee Barnnabaasa kaalleeza. Ammaneezitay Xooss aadho keehatithayid miinggii yezoday garkk untan zoreeza.

⁴⁴ Kaalliza maala gallas katama yez asaypp oonkk attekka god hellodayi gaamitay Xooss qaala si7odayis shiiqueeza.

⁴⁵ Zin Ayihuditay gaame asa be7eez wode Phawuloosa qinaattii e nashsha ixzii eza cazheeza.

⁴⁶ Phawuloosannee Barnnabaasa yashit-tekkaya, «Xoossa qalay tiinatii yinttis

odinttodayis koshshiza. Zin yi qaala ixzii medhina de7o ekkodayis nuus beezooya gi yi, yi ommas pirddeez gishos yikkeee nuunii Ayihude baazitayko maaqqoda.

⁴⁷ Yeykka Goday,

« «Alame kunithay ne baggar attoday garkk, taanii nena Ayihude baa woyas poo7o oothieza yeegii nuna azazeeza» » yeegeeza.

⁴⁸ Ayihude baazitay yeya si7ii ufayttii Xooss qaala bonchcheeza. Ma medhina de7os maraxint-teez ubbay ammaneeza.

⁴⁹ Goda qaalay ye gade ubba helleeza.

⁵⁰ Zin Ayihuditay, Ayihude baazar Xoosse goyn-niza bonchintteez maachchitannee katama yez gita asita Phawuloosal afannee Barnnabaasal afa denthitheeza. Ye asitay untan bayi7ith aykkii fa biittapp kesseeza.

⁵¹ Zin Phawuloosarannee Barnnabaasara ixiz-itayis malla maaqqoday garkk fa toke buli7a tiqisii Iqoononnee katama yhanigeeza.

⁵² Ma Anxooka yez ammanizitay Geeshsha Ayyanarannee ufayisar kumeeza.

14

Phawuloosannee Barnnabaasa Iqonoone yhanigeeza

¹ Kaseesaygarkk, Phawuloosannee Barnnabaasa Iqonoone Ayihuditay woosa keeth gelii gaame Ayihuditayinnee Ayihude baazitay ammanod hellodayis qaala odeeza.

² Zin ammanekka Ayihuditay, Ayihude baazitay wozina laammii ishitayil afa denthitheeza.

³ Hawaaritay ezayid gaame wode gam7eeza. Unttii yashitekka Goday bagga odeeza. Goday malatitannee oorithabaz unttii oothoday garkk unttis mawute inggii fa aadho keehetith qaalay tuma maaqqeezana beezeza.

⁴ Zin ye katama asay shaakinttii, baggay Ayihuditayir baggay ma Hawaaritayir maaqqeeza.

⁵ Ayihude baazitayinnee Ayihuditay fa halaqitayir wolla maaqqii hawaarita qohodayisinnee shuchchar shocodayis koyeeza.

⁶ Hawaaritay yeya erii, Lixxirannee Derbe giz Liqa7one katamitannee u heera yez biitta qosintteeza.

⁷ Ezayid Wonggile odeeza.

Phawuloosannee Barnnabaasa Lixxirannee Deriber

⁸ Yelintteezaypp aykkii nam77ii tokitay sileez yedhdhii eroowa pettii athay Lixxira yeza.

⁹ Ye athay Phawuloosa ododar bettii si7izazin. Phawuloosa eza dakkii be7adar paxodayis ees ammano yeza bi7ii,

¹⁰ fa qaala dhoqq udii, «Sitti gi ne tokayir eqqoba» yeegeeza. Yeezin, puthukk gi denddii eqqii yeth aykkeeza.

¹¹ Phawuloosa ootheeza asay bi7ii u fa qaala dhoqq udii Liqa7one doonar, «Xoossitay as aazii nuuko wodhdheeza» yeegeeza.

¹² Barnnabaasana, «Diya» gi, Phawuloosa yhaydda odar erintteezaya maaqqeez gishos eza, «Hermmeesa» gi suntheeza.

¹³ Katamaypp gaxa yez Diya giz eeqa kara kaahinay kormmitannee fudhe doosita hawaaritayis yarshshodayis kezii katama gaxa ke7eeza.

¹⁴ Zin Barnnabaasanee Phawuloosa yeya si7ii fa ma7a peedheeza. Asay gancce woxxi gelii,

¹⁵ fa qaala dhoqq udii, «Asayyo, yhaya abis oothee? Nuunikka yi garkk ase. Yha pathoowabazaypp salonnee sa7a, abbannee u gancce yez ubba baz medhdheez de7o Xoossayiko yi maaqqoday garkk yinttis nuunii Wonggile ododa.

¹⁶ E binii asay fa oge fa oge yhammaday garkk dakkii ashsheeza.

¹⁷ Zini ira salopp bukkiseeza, kathakka woder woder inggeez, kathi inggii yinttan gaame ufaysseeza, yeezii yinttis lo77o baz udii paas markka dhabisekka» yeegeeza.

¹⁸ Hawaaritay yeya gi paas asay yarshshaamay garkk waayer kayiseeza.

¹⁹ Anxookappennee Iqoononeppe ye7eez Ayihuditay, asa fa bagga mahii shuchchar Phawuloosa caddeeza. Unttis E yhayqqeezibaz aazin katamapp gaxa goochchii kanggii oleeza.

²⁰ Zin ammanizita yi7ii, e yuushayid galchchii eqqeezazin E denddii katama geleeza. Wonttitha gallas Barnabaasar pettipp Derbe qiteeza.

Phawuloosannee Barnnabaasa Soore Anxooka maaqqeeza

²¹ Unttii Derbe katama Wonggile odii gaamita ammantheezaypp guye Lisxira, Iqoononnennee Phisida Anxooka maaqqeeza.

²² Ye katamitayid yez ammanizita mihithitara untii ammanor minggod garkk zorttar, «Xoossa kaatetitha gelodayis nuunii gaame waaye ekko-dayis beeziza» yeegii taamarsseeza.

²³ Ma woosa keethitayis ommas ommas cimita dooreeza. Xoomeezayppennee woosseezaypp guye untii ammaneez Godayis u hadara inggeeza.

²⁴ Phisida biitta kanthii aadhii Phinfile yhanigeeza.

²⁵ Phergge qaala odeezaypp guye Axaala yhanigeeza.

²⁶ Yeypp untii fa poleez oosayis Xooss aadho keehatithayis untan hadara inggeez Anxooka markkaber maaqqeeza.

²⁷ Anxooka hellii woosa keeth asa shiishii Xoos-say untara oothiez oosa ubbaynnee Ayihude maaqqekka asay ammanoday garkk untis way-izii oge dooyeezako odeeza.

²⁸ Ezayid ammanizitayir gaame wode gam7eeza.

15

Yerusalaame shiiqo

¹ Pettii pettii asay Yihudapp Anxooka yhanigii, «Muse wogay garkk yi dookalinttaam ixiko at-todayis danda7ooya» gi ammanizita taamarsso aykkeeza.

² Yey Phawuloosannee Barnnabaasa untar gaame palamoday garkkennee wacoday garkk oothieza. Yey gishos, Anxooka yez pettii pettii asay Phawuloosarannee Barnnabaasara

Yerusalaame yhanigii Hawaaritayrannee cimitayir woli hellii ye oda billoday garkk qofa acceeza.

³ Woosa keethay untan kiittin yhanigeeza. Unttii finqqe Samaarera aadhittar Ayihude baazitay Xoossiko wayizii maaqqeezako odeeza. Yey ammanizita ubba gaame ufaysseeza.

⁴ Unttii Yerusalem hellin woosa keethay, Hawaaritayinnee cimitay untan mokkeeza. Xoossay untan ootheezi bazita ubba u odeeza.

⁵ Zin Ferisaawitay baggapp ammaneez pettii pettii asay denddii eqqii, «Ayihude baazar ammaneez asay dookaliintodayisinnee Muse hikka naagodayis beeziza» yeegeeza.

⁶ Hawaaritayinnee cimitay yeya tobbodayis shi-iqueeza.

⁷ Gaame odintteezaypp guye, Phixiroosa denddii eqqii, «Ta ishuntho, Ayihude baazitay Wonggile qaala ta doonaypp si7ii ammanoday garkk tiinatii tana Xooss yi ganccepp dooreezana yi eriza.

⁸ As wozina eriza Xooss Geeshsha Ayyana nuus inggeezay garkk untiskka inggeezana markkatteeza.

⁹ Ammanor u wozina geeshsheez gishos nu gancennee u gancce dummatith gaddekkaya.

¹⁰ Yey gishos, nu aditayne nuunii tookkodayis danda7inttoowa qambbara ammanizitay mor-gayil gaddii yhatti abis Xoossa paace?

¹¹ Goda Yesuusa aadho keehatithayid untii atteezay garkk nuukka atteezana ammanoda» yeegeeza.

¹² Asay si77i gi, Barnnabaasannee Phawuloosa Ayihude maaqqekka asay gancce fa baggar Xoossii oothiez malatitannee oorthibaz ubba ododar si7eeza.

¹³ Unttii nashsha haaseezaypp guye Yayqqooba, «Ishuntho, ta giza si7oytta.

¹⁴ Xoossii Ayihude baazitay ganccepp fa as doorodayis kezii untan tiin wayizii qopeezako Simoona odeeza.

¹⁵ Nabitay qaalay yhayir qariza. Geeshsha Max-aafayid,

¹⁶ «Yhaypp guye, taanii maaqqoda,
wodhdheez Dawute keetha denthoda.
Laalintteez keethaka ta mahii essoda.

¹⁷ Atteez as ubbay taako ye7oda,
taanii xeegeez Ayihude maaqqekka as ubbay tana koyoda.

¹⁸ Binipp aykkii yey erinttoday garkk udeez
goday, tana yeegiza.

¹⁹ «Yey gishos, ta qofay Xoossiko maaqqeez Ayihude baazita nuunii waayithamay garkke.

²⁰ Zin unttii eeqas yarshshinttii tuneezibaz maamay garkk, lagitaamay garkk, bawuta maamay garkkennee suuthii uzhaaminnee maamay garkk untis nuunii dabddaabbe xaafodayis koshshiza.

²¹ Muse higgay binipp aykkii maalagalas Ayihude Woosa Keethi nabbabinttiza katama ubbayid sabbakinttiza» yeegeeza.

²² Yeypp guye, hawaaritaynnee cimitay woosa keeth as ubbayir wolla fa ganccepp xiqqa asita

doorii Phawuloosarannee Barnnabaasara Anxooka dakkodayis qofa acceeza. Unttii unddenna erintteez kaalithiza nam7i asita Barssabaasa ginttinttiza e Yihudannee Sillaase dooreeza.

²³ Yhay garkk ginttinttii xaafintteez dabddaabba untal afa dakkeeza: «Nuunii hawaaritaynnee cimitay yi ishitay, Anxooka, Soorarannee Kilqqe yez Ayihude maaqqekka ishitayis nu sarotha kiittoda.

²⁴ «Nuunii kiittekka asitay nu ganccepp yhanigii, «Yi dookalinttodayisinnee higge naagodayis beeziza gi» yinttan waayitheezeannee yilotheeza nu si7eeza.

²⁵ Nuunii dosiza Barnnabaasannee Phawuloosa doorintteez asayir wolla yinttiko kiittodayis pettii wozinar nu murtteeza.

²⁶ Unttii nu Goda Yesuus Kiristtoosa gishos fa shemppo aathii inggeeza.

²⁷ Yey gishos, nuunii xaafeezana unttaa fa doonarakka gujjii yinttis ododay garkk e Yihudannee Sillaase azazeza.

²⁸ «Yha koshshizitaypp attin hara toofo yinttan toossaamay garkk nuunnee Geeshsha Ayyanay lo77o qofa maaqqeezana be7eeza

²⁹ Eeqas yarshintti tuneezibaz miipatte, suuth uzhipatte, bawuta miipatte, lagite ayikkipatte. Yha ubbaypp yi, yinttan naagiko lo77o baz udiza. Saro yezoytta» yeegeeza.

³⁰ Yey gishos, kiitintteez itay moyizinttii Anxooka yhanigii ammaniza asita shiishii, dabddaabbe inggeeza.

³¹ Unttii ye minthatho dabddaabba nabbabeezaypp ufaytteeza.

³² Ma e Yihudannee Sillaase u fa ommas nabita maaqqeez gishos ammanizita lo7ithii zorii minthatheeza.

³³ Unttii Anxooka xiqqa gallas betteezaypp guye ishitay lo77or moyizin fana kiitteezitayiko maaqqeeza.

³⁴ * [Zin Sillaase ezayid attodayis koyeeza.]

³⁵ Ma Phawuloosarannee Barnnabaasar hara gaame asitayir wolla Goday qaala tamarssitarannee Wonggile odittar Anxooka gam7eeza.

Phawuloosa Barnnabaasapp shaakintteeza

³⁶ Xiqqa gallasapp guye Phawuloosa Barnnabaasako, «Nuunii Goday qaala odeez katama ubbitayid ammanizitay waafa yezako guye maaqqittar wola be7adannee eroda» yeegeeza.

³⁷ Barnnabaasa Marqqoosa ginttinttiza Waan-nisa paar yhanigoday garkk koyeeza.

³⁸ Zin Phawuloosa Marqqoosa paar yhanigoday garkk koyekkaya. Yeykka, E Phinfil shaakinttii untar oothodayis yhanigekka gishosi.

³⁹ U gancce iita kachchii kezin pettay pettaypp shaakintteeza. Barnnabaasa Marqqoosa ekkii markkaber Qoophiroosa kezeeza.

⁴⁰ Zin Phawuloosa Sillaasena dooreeza; ammanizitay Phawuloosa Xooss aadho keehatithayis hadara inggeezaypp guye e qiteeza.

⁴¹ Yeezii, woosa keethita minthathittar Soorarannee Kilqara aadheeza.

* **15:34** Pettii pettii kusher xaafintteez binii maxaafitayid payido 34 baaya. **15:38** Haw. O. 13:13

16

Ximaatoosa Phawuloosanannee Sillaase heleeza

¹ Phawuloosa Derbbennee Lixira heleeza. Eza-yid Ximaatoosa giz ammaniza as yeza. E in-datakka ammaniza Ayihude maachch, e aday Girike asii.

² Lixirarannee Iqonoone yez ammizitay Ximaatoosa bagga lo7ithii markkatteeza.

³ Phawuloosa Ximaatoosa paar kanggodayis koyeeza, eez aday Girike as maaqqeeza ye aqo yez Ayihude ubbay eriza gishos eza dookaleeza.

⁴ Unttii katamitayira yhanigtar Yerusalaame yez hawaaritaynnee cimitay acceez qofa ammanizitay naagoday garkk unttis odittar aadheeza.

⁵ Yey gishos, woosa keethitay ammanor minggitar, payidorakka gallas gallas gaanggii gaanggii yhanigeeza.

Phawuloosa Maqadoona yhammadaygarkk xee gintteeza

⁶ Iisiya qaala odaamay garkk Geeshsha Ayyanay untan kayeez gishos Phirgerannee Galata biittar aadheeza.

⁷ Unttii Miisa zawa helleez wode Bitana yhammadayis butintteeza. Zin Yesuusa Ayyanay untan kayeeza.

⁸ Yey gishos, unttii Miisa kanttar aadhittar Xiro7aada wodhdheeza.

⁹ Phawuloosa qamma qoncithar pettii Maqadoona as faako, «Maqadoona piinggii nuna maaddooye» yeegttar eqqii woosodar be7eeza.

¹⁰ Ajuuta E be7eezaypp guye ellisii nuunii Maqadoona yhammadayis koyeeza. Yeykka,

Wonggile ezayid yez asayis ododayis Xoossay nuna xeegeez aazeeza.

Liida Kiristtoosa ammaneeza

¹¹ Xiro7aadapp denddii markkabe gelii Samoti-raaqe yhanigeeza, wonttitha gallas Naaphule yhanigeeza.

¹² Yeypp denddii Maqadoona biitta yez Filphisoosa giz erintteez worada katama yhanigeeza. Ma Filphisoosa Oroome kaatay olar mooddeez katama. Nuunii ye katamayid xiqqa gallas betteeza.

¹³ Maala gallas katamaypp gaxa borkka kale Ayihuditay Xooss woossiza aqo yezana qoppii ged yhanigeeza. Ye aqayid shiiqeez maachchitayis qaala odeeza.

¹⁴ Nuna si7odar asaypp pettii Liida ginttint-tiz Tiyatiroona katamapp ye7eeza, Xooss ammaneeza zoqo afla zal7iza, asita yeza. Phawuloosa odiza iza si7oday garkk Goday I wozina dooyeeza.

¹⁵ Liida fa kara asayir pettipp xammaqintteezaypp guye nuuko, «Yi tana Goda tuma ammaneeza giiko ta kara yi7ii yezoytta» gi miinthii wooseeza.

Phawuloosarannee Sillaasera accintteeza

¹⁶ Nuunii Xoossa woossiza aqa yhammadar iita ayyana iil afa yezanna kaayor fa goditayi gaame miishe ki7iz pettii ayllata nuna heleeza.

¹⁷ Phawuloosannee nuna kaallii, «Yhaytitay Ub-baypp afa Xooss ayllita! Unttii yi attoda oga odizita» gi uukkeeza.

¹⁸ Ubba gallas yey garkk giza. Zini Phawuloosa yilottii guye maaqqii, ye ayyana, «Yesuus

Kiristtoosa sunthayir izippe kezoba» gi azazeeza. Izirakka iita ayyanay izippe kezeenza.

¹⁹ Zin I godittay u miishe denggiz ogay dhabeeza bi7ii, Phawuloosannee Sillaase aykkii, awudare dayinnitay tiina goochchii kanggeeza.

²⁰ Dayinnitay tiina u kanggii, «Yhayititay Ayihude as maaqqittar nu katama asa iita waayithiza.

²¹ Nuunii Oroome gade as maaqqodar ekko-dayisinnee oothodayis woga baabaz taamarssiza» yeegeeza.

²² Asay pettii bagga maaqqii, Phawuloosal afannee Sillaasel afa denddeeza. Dayinnitay u aflagaarrii gufer untan shocoday garkk azazeeza.

²³ Untan gaame yhadhdheezaypp guye achch kara geliseeza. Achch keetha naagizay untan miinthii naagod garkk azazeeza.

²⁴ Achch kara naagizay ye kiita ekkii, Phawuloosannee Sillaase achch karayis qol7a geliseeza. U toka duthar duuxeeza.

²⁵ Zin giddii bilahe maaqqodar Phawuloosarannee Sillaasera woossittarannee mazimure yexxittar Xoossa galattiza. Achch kara yez hara asitaykka untii gizibaz si7iza. ²⁶ Qoppekka achch kara baasay eni7od hellodayis biitta eni7o maaqqeeza. Ye saatatekka penge ubbay dooyintteeza; accintteez as ubba santhalaatay bilintti wodhdheenza.

²⁷ Achch kara naagizay genttapp barkkodar achch kara penge ubbay dooyintteeza bi7ii achch asay kezii qiteeza aazin fana wodhodayis mashsha ekkeeza.

²⁸ Zin Phawuloosa qaala dhoqq udii «Nu ubbay yhaydda yeza nena qohippe» yeegeeza.

²⁹ Achch kara naagizay xomppe woossii ekkii ellisii gancce laasii Kukkorittar Phawuloosa ti-inannee Sillaase tiina xugguneeza.

³⁰ Unttan bale kessii, «Ta goditayyo, taanii atto-dayis ab udodayis beezee?» yeegeeza.

³¹ Phawuloosarannee Sillaaser eziko, «Goda Yesuus Kiristtoosa ammanoba; neerannee ne kara asayira attoda» yeegeeza.

³² Unttii eesinnee e kara yez ubbayis Goday qaala odeeza.

³³ Qamma ye saatatekka achch kara naagizay unttan kanggii u sambara meecceeza. Ellisii fa kara as ubbayir xammaqintteeza.

³⁴ Phawuloosannee Sillaase fa kara kanggii unt-tis katha aatheeza. E fa kara as ubbayir Xooss ammaneez gishos ufaytteeza.

³⁵ Sa7ay wonttin daynnitay, «Ye asita bili7oba» yeegii poolise halaqita eziko azazeeza.

³⁶ Achch kara naagizay, «Yi bilinttodaygarkk daynnitay azazeeza. Yikkee, kezii saro yhanigoytta» yeegii ye kiita Phawuloosas odeeza.

³⁷ Zin Phawuloosa ye poolise halaqitayko, «Nu-unii Oroome as* maaqqadar unttii nuna pirda bagga asay tiina yhadhdhii, achch kara oleeza. Yhatt nuna geemar kezii qito ginee? Hanena, unttii fa ommas yi7ii nuna kesso» yeegeeza.

* **16:37 Oroome as:** Phawuloosa fana Oroome as yeegii xeegeezay ye wode Ayihude biitta haarizay Oroome kaatetitha maaqqeez gishosii. Ye wode Oroome biitta yez asay pirda baythii garafinttooya.

³⁸ Poolise halaqitay daynnayis yeya odin, Phawuloosarannee Sillaasera Oroome gade as maaqqeeza si7eez wode yashitteeza.

³⁹ Yey gishos, daynnitay yi7ii untiko, «Nuunii yinttan qoheeza» geeza. Achch karapp bale unttan kessii, katamaypp kezii qitodaygarkk woosseeza.

⁴⁰ Phawuloosarannee Sillaasera achch karapp kezii Liida kara yhanigeeza. Ezayid ammanizita hellii unttan minthathii kezii qiteeza.

17

Phawuloosara Sillaaser Teselonqqe Qiteeza

¹ Phawuloosarannee Sillaasera Amfipholi-inarannee Apholoonar aadhii Teselonqqe yhanigeeza. Ezayid Ayihude Woosa Keethi yeza.

² Phawuloosa kaseesay garkk ezayid geleeza. Ezayid hayidzii saamintta Xooss qaalapp asayis odeeza.

³ Kiristtoosa waaye ekkodayisinnee yhayiqopp dendodayis beezizana untis qonccer odittar, «Yesuusa yha taanii yinttis odizay Kiristtoosa» yeegeeza.

⁴ Unttapp pettay pettay oday tuma maaqqeezana ma77ii Phawuloosarannee Sillaasera tobbeeza. Yey garkkekka, Xoossa goyinniza gaame Girike asaynee gaame bonchchintteez maachchitaykka untar tobbeeza.

⁵ Zin Ayihuditay qinaattii azaliza iita asita gabe ogepp shiisheeza. Katama gancce cabbo medhdheeza; Phawuloosannee Sillaase asayis aathii immadayis kezii Yaasona kara ellis qiteeza.

⁶ Phawuloosannee Sillaase unttis benttaam ixxin, Yaasonennee ishitaypp pettii pettii ammanizita katama halaqitayiko goochchii kanggii, «Yeyititay biita ubba buqqizitay yhatti ma nuuko ye7eeza.

⁷ Yaasone untan fa kara gaddeeza. Yhayititay, «Yesuusa giz hara kaatay yeza» gi Qeesare kiita ixixizita» yeegii uukkeeza.

⁸ Shiiqueez asaynnnee katama halaqitay yeya si7in ezis hanod baz dhabeeza.

⁹ Halaqitay Yaasonannee harita waaser bili7eeza.

Phawuloosannee Sillaase Beera gade taamarsseeza

¹⁰ Ammanizitay Phawuloosannee Sillaase qamar Beera dakkeeza. Beera hellii, Ayihude Woosa Keethi geleeza.

¹¹ Beera asitay Teselonqge asitaypp aadheez wozina luulita. Unttii qaala kunth wozinapp ekkeeza; gallas gallas Geeshsha Maxaafita nab-babitar Phawuloosa geezay tuma maaqqeezana shaakkii ereeza.

¹² Yey gishos, untapp gaamitay, Girikitayppekka bonchchintteez xiqqa maachchitaynnnee dhiirathitay ammaneeza.

¹³ Zin Teselonqge yez Ayihuditay Phawuloosa Xooss qaala Beera gaddekka odeezana si7ii Beera yi7ii asa buqeeza.

¹⁴ Yeypp guye, ammanizitay ellisii Phawuloosa abba kale dakkeeza. Zin Sillaasennee Ximaatoosa Beera atteeza.

15 Phawuloosana moyizeez asay Ateena helthii ashsheeza. Ye asay Sillaasennee Ximaatoosa untis danda7inttiko ellsii faako ye7od garkk Phawuloosa kiitteez kiita ekkii Beera maaqqeeza.

Phawuloosa Ateena biittal

16 Phawuloosa Ateena Sillaasennee Ximaatoosa naagtтар, katamay eeqar kumeezana bi7ii shentteeza.

17 Yey gishos, Ayihude Woosa keetha Ayihuditayirannee Xoossa goynniza Ayihude maaqqekka asayir ma gabelakka fana heleez asayir ubba wode palamiza.

18 Ephiqoroosa baggapennee Isttoykantta gintinttiz eranchitaypp pettay pettay Phawuloosar palameeza. Unttapp pettay pettay, «Yha doonan-chay ab ododayis koyineshsha?» yeegeeza.

Yhankkitay Phawuloosa Yesuusannee yhayiqopp denddo bagga untis odeez gishos «Oroth eeqitay bagga odiz aaziza» yeegeeza.

19 Phawuloosa aykkii Aryoospagoosa ginttiz shi-igo aqa kanggii, «Yha neenii taamarssiza orothibazay abizako nuna erisaamoo?

20 Abis giiko, neenii nuus orothibaz odizay; abizako nuunii erodayis koyiza» yeegeeza.

21 Ateena as ubbayennee ezayid yez imathitay orothibaz odinttekazarannee si7ekka peezhooya.

22 Phawuloosa Aryoospagoosa shiiqeez asay tiina eqqii, «Ateena asayyo, yi Xoossitayis ubba bazar gaame yashittiza taanii bi7iza.

23 Taanii yi katamayir yuuyttar yi goynniza aqita be7adar «Erinttoowa Xoossis» ginttinttii xaafintteez yarshsho aqo denggeeza. Yha yi erekkazar goynnizana taanii yinttis odiza.

²⁴ Sa7annee sa7all yez ubba baz medhdheez Xoossay, salonnee sa7a Goday, asii keexxeez keetha yezooya.

²⁵ E de7onnee, shempponnee ubba baz as ubbayis inggiza gishos pacce yez as garkk as maadee koyooya.

²⁶ Asii yezod wodayisnee aqayis zawa inggeeza. Xoossay as zerithi ubba pettii athaypp medhdhii biita ubbayid gaddeeza.

²⁷ E yeya ootheezay asii eza koyoday garkkennee koyii demmaday garkkesii. Hanikokka E nuupp haakkekkaya.

²⁸ Yinttipp pettii pettii yexxizitay, «Nuunii e na7ita» geezay garkk, Nuunii ezayid pathi yezii, eni7iza.

²⁹ Yikkee, nuunii Xooss na7ita maaqqiz gishos «Xoossay as ecetitharannee qofar worqqapp woy birapp woy shuchchapp oosintteezibaz aaziza» yeezii qoppodayis beezooya.

³⁰ Yey gishos, Xoossii tiina asay erekka ootheezana ashshii aadheeza, zin yhatti ubba aqo yez as ubbay nagarapp maaqqoday garkk azaziza.

³¹ Abis giiko, Xoossii fa dooreez athayir sa7all yez as ubbayil afa xillo pirda pirdodayis gamma giigisii gaddeeza. Eza yhayiqopp denthii yeya as ubbayis tumaseeza» yeegeeza.

³² Unttapp pettii pettii asitay yhayiqopp dendo bagga Phawuloosapp si7ii, ezal afa ari7eeza. Zin yhankkitay, «Nuunii yeya neepp gujjii si7odayis koyiza» yeegeeza.

³³ Yey gishos, Phawuloosa u ganccepp kezeenza.

³⁴ Zin pettii pettii dhiithitay Phawuloosa hellii ammaneeza. U ganccepp Aryoospagoosa pirdde daynna Diyonasoosa ginttiz asita, Damarssu ginttiz pettii asttinnee yhankkitay yeza.

18

Phawuloosa Qoronttoosa qiteeza

¹ Yeypp guye, Phawuloosa Ateenapp kezii, Qoronttoosa qiteeza.

² Ezayid Aqila ginttiz Phanxoosa yelintteez pettii Ayihude as denggeenza. Ayihude as ubbay Oroomeppe kezoday garkk kaatay Qalawudoosa kiitteez gishos xiqqa wodepp tiina E fa machchat Phirisqilar Ixaalepp ye7eeza. Phawuloosa untan hellodayis ye7eeza.

³ E oosay unttiisay garkk dunkkaane siko maaqqeez gishos untar bettii wolla ootheeza.

⁴ Phawuloosa maala gallas ubbayid Ayihuditannee Girikita ammanthodayis Ayihude Woosa keetha untar odinttiza.

⁵ Sillaasennee Ximaatoosa Meqidonapp yi7in Phawuloosa fa wode ubba inggii Ayihuditayis Yesuusa E, Kiristtoosa gi azala bayth markkattitar qaala odeeza.

⁶ Zin untii Phawuloosana ixzii eza cazhin Phawuloosa fa aflaypp buli7a tiqqisttar, «Yi suuthayis yinttan oyico; taanii yhanpp geeshsh. Yhanpp maaqqii, taanii Ayihude maaqqekka asayiko yhammada» yeegeenza.

⁷ Yeypp kezii Xooss goynniza Titosa Yosxoosa giz athay kara yhanigeeza. Yosxoosa karay Ayihude Woosa Keethay kale yeza.

⁸ Ayihude Woosa Keeth halaqay Qarisphoosa fa kara as ubbayir Goda ammaneeza. Qoronttoosa asitayppekka gaamitay Xooss qaala si7eez wode ammanii xammaqintteeza.

⁹ Goday pettii gamma Phawuloosas qoncithar yi7ii, «Yashitippe; odobapp attin si77i giipe.

¹⁰ Taanii neer yeza. Taas yha katamayid, gaame as yez gishos nena qohi iita baz oothod as oonkka baaya» yeegeeza.

¹¹ Yey gishos, Phawuloosa Xooss qaala asa tamarssittar pettii laythinnee usuppun agina untar betteeza.

¹² Gaaloosa Akkaya biitta aqisodar Ayihuditay pettipp Phawuloosal afa denddi pirdde keethi kanggi,

¹³ «Yha athay higge ixxi, asay Xooss goynnoday garkk udiza» yeegeeza.

¹⁴ Phawuloosa nashshod hanodar, Gaaloosa Ayihuditayko, «Ayihuditayyo, yey iita ooso woy naaqa maaqqeezako taanii yi bagga danda7i si7odayis beeziza.

¹⁵ Zin qaalas, yi sunthayisinnee yi higgayis yi palamiza baz maaqqiko yi, yinttis billoytta; yeya taanii pirdaamii» yeegeeza.

¹⁶ Yeezii, untan pirda keethaypp bale kesseeza.

¹⁷ Yeypp guye, as ubbay Ayihude Woosa Keeth halaqa Sosteenisa aykkii pirdde keeth tiina yhadhdheeza. Zin Gaaloosas yey abkka aazekkaya.

Phawuloosa Anxooka maaqqeeza

¹⁸ Phawuloosa gaame gallas Qoronttoosa betteezaypp guye ammaniza asa sarothi, Phirisqiliranee Aqilara markkaber Soora yhanigeeza.

Zin E yhanigodaypp tiina ees gatho yez gishos Kinkkiroosa katamayid fa omma meedeeza.

¹⁹ Unttii Efesoone hellii Phawuloosa Phirisqilannee Aqiila ezayid ashsheeza. Zin paas Ayihude Woosa Keethi gelii Ayihuditayira odintteeza.

²⁰ Unttii paar gaame wode bettoday garkk Phawuloosana woosseeza zin E ixeeza.

²¹ Unttapp shaakinttii, «Xoossii giiko yinttiko maaqqii ye7oda» yeegii Efisonepp markkaber dendeeza.

²² Qisaare hellii Yerusalaame yhanigii woosa keeth asay sarotheezaypp guye Anxooka qiteeza.

²³ Ezayid xiqqa wode gam7eezaypp guye taamarita asita ubba minthathittar Galatiyyarannee Phirger aadheeza.

Aphiloosa Efesoonalannee Qoronttoosala

²⁴ Iskkinddire yeleta maaqqeez pettii Aphiloosa giz Ayihude as Efesoone qiteeza. E oda eriza asinnee Xooss qaala lo7ithii eriza asii.

²⁵ E Goda oga taamarii, ayyanar xuuginttii Yesuusa bagga luule odizannee tamarisiza. Hano zin, Waannisa xinqqata aadda eriza.

²⁶ E Ayihude Woosa keetha yashittekkazar taamarsseeza. Phirisqilannee Aqiila E odizana si7ii eza paar kara kanggii Xoossa oga tiinaasaypp aathii ees odeeza.

²⁷ Aphiloosa Akkaza yhammadayis koyin Efesoona yez ammaniza asay e qofa ekkii Akkaya yez ammanizitay eza makkoday garkk untis dabddaabbe xaafeeza. E ezayid hellii Xooss aadho keethithar Yesuus Kiristtoosa ammaneezita gaame maaddeeza.

²⁸ Yesuusa E Kiristtoosa maaqqeezana Ayihuditayis Xooss qaalaypp qonccisii woya ubbay tiina miinthii taamarsseeza.

19

Phawuloosa Efesoona qiteeza

¹ Aphiloosa Qoronttoosa yezin, Phawuloosa wookki bagga gader aadhii Efesoone helleeza. Ezayid pettii pettii ammaniza asita denggeeza.

² Unttanakka, «Yi ammaneez wode Geesha Ayyana ekkeennee?» yeegii oyiceeza.

Unttii, «wa77a, ekkekkaya; hara attozin, Geesha Ayyana yezanakka nu si7ekkaya» yeegeeza.

³ Phawuloosa untiko, «Yeezin, yi abar xammaqintteennee?» yeegeeza.

Unttii, «Nuunii Waannisa xinqqata xammaqintteeza» yeegii maheeza.

⁴ Phawuloosa, «Waannisa paapp guyer yi7iz Yesuusana asay ammanoday garkk asayis oditar, maarotithis beeziza xinqqata xammaqeeza» yeegeeza.

⁵ Unttii yeya si7ii Goda Yesuusa taaarita maaqqodayis E sunthar xammaqintteeza gallas gallas Geeshsha Maxaafita nabbabiza.

⁶ Phawuloosa fa kusha untal afa gaddin Geeshsha Ayyana untal afa wodhdhin, duma duma doonar odintteeza; ma tinbbite odeeza.

⁷ Ye aqayid taphpho nam7e maaqqiz asitay yeza.

⁸ Phawuloosa Ayihude Woosa Keeth gelii, Xooss kaatetithii bagga yashittekkazar palamtarannee

lo7ithii qonccisttar untar hayidzii agina hello-dayis gam7eeza.

⁹ Zin untapp pettay pettay dhube maaqqii gaame asay tiina Goday oga cazhii ammanaam ixxeeza. Phawuloosa ammanizita untapp shagii ekkii Xiranoosa giz timirtte keetha ubba wode untan taamarsseeza.

¹⁰ Phawuloosa nam77ii layithi hellodayis qaala odeeza. Yey gishos, Iisiya yez as ubbay, Ayihudi-tayinne Ayihude baazitay Goday qaala si7eeza.

Xoossay Phawuloosa kushe ootheetz malatita

¹¹ Xoossay Phawuloosa kushe wolqqama mal-abazita ootheetza.

¹² Yey gishos, asay e galla bochcheez maarabe woy ma7o harggintteez asayis kanggiza. Untikka paxiza; tuna ayyanitaykka untapp keziza.

¹³ Tuna ayyanita kessitar yuuyiza Ayihudi-taypp pettay pettay, «Phawuloosa sabbakiza Yesu-usa sunthayir kezoytta gi yinttan azaziza» yeegii, tuna gaalenitay aykkee asitayil afa Goda Yesuusa suntha xeegeeza

¹⁴ Ayihude Qeese halaqitaypp petta maaqqeez Asqeewa ginttiz athayis yeya oothiza laappun dhi-irath na7itay yeza.

¹⁵ Zin tuna ayyanay untiko, «Taanii Yesuusakka Phawuloosa baggakka eriza, zin yinttii oonant-tara?» yeegeeza.

¹⁶ Tuna ayyana aykkee athay untal afa doonggii wodhdhii, untal madoth kessii, ye karitipp kallo laasii dhabod hellodayis wolqqamii gameeza.

¹⁷ Efesoona yez Ayihuditayinnee Ayihude baazitay ubbay yeya si7ii iita yashitteeza. Goda Yesu-usa sunthay gaame bonchintteeza.

¹⁸ Ammanizitaypp gaamitay fa oothiez iita oosa buuxittarannee qoncce odittar yi7iza.

¹⁹ Murunitaypp gaamitay fa maxaafita shiishii as ubbay tiina micheeza. Ye maxaafitay waagay waagay ishatam mukule bira* maaqqeeza.

²⁰ Yey garkk hanii Xooss qaalay wolqqar diccittarannee dalgittar qiteeza.

Efesoone katama cabbotithi dendeeza

²¹ Yey polintteezapp guye Phawuloosa, «Taanii Yerusalaame maaqqii Oroome yhammadayis beeziza» yeegii Maqadoonarannee Akkayara aadhii Yerusalaame yhammadayis qofa acceeza.

²² Ma fana maaddizitaypp nam7ita Ximaatoosannee Erasxoosa Maqadoona kiittii, paas Iisiya xiqqa wode gam7eeza.

²³ Ye wode yha ogay gishos iita kachchii kezeenza.

²⁴ Pettii bira oothiz Dimexiroosa ginttiz athay Arxemisa eeqa kara misile birapp medhdhii gaame wodhe denggizazin.

²⁵ Yey gishos, yey garkk ooso oothizita pettipp shiishii, «Asayyo, nu duretithay yha oosaypp maaqqeezana yi eriza.

²⁶ Phawuloosa, yhay «As kushe oosintteezitat Xooss baaya» yeegii, Efesoontanannee xiqqa biittitaypp attin muume Iisa biitta ubbayil yez gaame asayis odii ammantheezannee maheeza yi be7eezannee si7eeza.

* **19:19** *Shuchch bira*: Maatoosa 26:15 bo7oytta.

²⁷ Meto maaqqeezay, nu oosay leqintteezita aadda baazin Iisannee gade ubbayil yez as goynniza gita Xoossinne Arxemisa karay odinttekka attodaynnee E damotithaykka wodhdhoday yashshiza» yeegeeza.

²⁸ Asay yeya si7ii shener kumii, «Efisoona Arx-emisa bayira» yeegii uukkeeza.

²⁹ Ye uufay katama ubba helleeza. Phawuloosa laggita Maqadoona asita, Gaayoosannee Arsxirokoosa untar wolla dafi ekkii kaa7iza aqa woxxeeza.

³⁰ Phawuloosakka asay shiiqeez aqo gelodayis koyeeza, zin ammaneezitay eza kayeeza.

³¹ Iisa biitta halaqitaypp Phawuloosas zhame maaqqeez pettay pettay Phawuloosako kiittii, «kaa7iza aqo qonccer kezii benttippe» gi eza woosseeza.

³² Shiiqeez asayis hanod baz dhabeeza; gaang-giza bagga asay hara attozin abis shiiqeezako erekkazay gishos pettay pettibaz gi uukkiza ma yhankkitay hara baz gi uukkiza.

³³ Ayihuditay Iskkinddirose giz atha woya gancepp tiina urqqeez, pettii pettii asay E godbaza odin Ezii asay si77i goday garkk fa kushayir mallii beezii, asayis mootinttodayis eqqeeza.

³⁴ Zin Iskkinddire Ayihude as maaqqeez asay erii nam77ii saate maaqqod hollodayis ubbay pettii qaalar, «Efesoona Arxemisa damma» yeegii uukkeeza.

³⁵ Wurssitha ye Katamitii xaafay woya si7ii udii, «Efesoona aso! Efesoona katamay gita Arxemiisas eeqa karannee salopp wodhdheez, gita shuchch naagiza maaqqeezana eroowa as oonoo?

³⁶ Yhaya lahiza as baa maaqqiko yi si77ii go-dayisnnee ellisii 7iita baz oothopp naaginttodayis beeziza.

³⁷ Yi yha asita, eeqa keeth miishe kasttekkazitannee nu Xoossita cazhii be7ekkazita ke7eeza.

³⁸ Yey gishos, Dimexiroosannee ezar yez oosanchchitay oorakka mootintto koykko, pirdde keethi yeza; daynnitaykka yeza; u mootodayiskka danda7iza.

³⁹ Zini yi hara oda koykko, Shanggo shiiqol oday bi7intto.

⁴⁰ Yey maaqqaam ixiko yhayino haneezibazayis Oroome kaatetithay nuna oyicoda. Yha buqithayis gaaso baa gishos nuunii malsse mahodayis danda7ooya»

⁴¹ yeegii shiiqa laaleeza.

20

Phawuloosa Maqadoonannee Girike qiteeza

¹ Cabbotithay hayizeezin Phawuloosa ammaniza asita xeegisii untan minthatheezaypp guye sarothi Maqadoona yhammadayis kezeeza.

² E aadhiz biittayid yez ammaniza asayis zore qaala odii minthatheezaypp guye Girike gade qiteeza.

³ E ezayid hayidzii agina bettii, markkaber Soora yhammadayis murtii yezin, Ayihuditay eza wodhodayis kozhizana erii Maqadoonar guye maaqqodayis kozheeza.

⁴ Phawuloosa moyizeeza Beerappe Pharhuusa na7a Sophaxiroosa, Teselonqqepp Arsxirokoosannee Sikondduusa, Derbbep

Gaayoosa, Iisiyapp Tikiqoosa, Xirofimoosannee Ximaatoosa.

⁵ Yeyititay tiina yhanigii nuna Xiro7aadal naagiza.

⁶ Nuunii boora Baale bonchcheezaypp guye Pilphisoosapp markkaber denddii, ichchintha gallas untan Xiro7aada hellii ezayid laappun gallas gam7eeza.

Awuxikoosa Xiro7aada yhamadayis dendeenza

⁷ Saaminttapp tiina gallas nuunii boora wolla maadayis shiiqii yezin, Phawuloosa wonttitha yhammadayis qoppeez gishos untis qaala odittar giddii bilahe hellodayis oda adussiseeza.

⁸ Nuunii shiiqii betteez pooqayil poo7o wazhzii geezin.

⁹ Ewuxikoosa ginttiz pettii paanthay maskkootel afa bettii, fana dogii gentteeza. Phawuloosa oda adusseezaypp Ewuxikoosa gentta aafer hayidzintho pooqaypp wodhdhii yhayqqeezana asay dentheeza.

¹⁰ Zin Phawuloosa wodhdhii, ezal afa xuggunii. Eza idinggii, «E yhayqqekkaya, hirigipatte» yeegeeza.

¹¹ Yeypp guye, fude pooqeel afa kezii boora baxxii meeza. Sa7a wonttod hellodayis asayis odeezaypp guye denddii qiteeza.

¹² Ye paxeez pantha kara kanggii gaame ufayteeza.

Phawuloosa Xiro7aadapp Milixe qiteeza

¹³ Zin Phawuloosa fana ezaypp mokkoday garkk nuus odeezay gishos nu tiinatii markkabekko yhanigii, Asoona yhammadayis

denddeeza. Abis giiko, E toker yhammadayis qoppeez gishos nuna yey garkk azazeeza.

¹⁴ E nuna Asoona hellin markkaber eza ekkii Mixiline ye7eeza.

¹⁵ Wonttitha gallas ezaypp denddii markkaber Kiyoozas tiina baggar yez aqa helleeza; ma wonttitha gallas Saamosa piinggii kaalliza gallas Mil-lixé helleeza.

¹⁶ Phawuloosa Iisiya gaame gam7odayis koyekka gishos Efesoone kanttar aadhodayis qoppeeza. Paas danda7inttiko Phenxeqosxe Baale gallas Yerusalaame hellodayis ellisiza.

Phawuloosa Efesoone cimitana zoreeza

¹⁷ Phawuloosa Miliixepp Efesoona kiittii woosa keeth cimita xeegeeza.

¹⁸ Woosa keeth cimitay eziko yi7in, unttiko yhay garkk yeegeeza: «Taanii Iisa geleez tiina gallas-app aykkii yinttar yezeez wode ubbayid wayizii yezeezako yi eriza.

¹⁹ Ayihuditay maqinttii taal afa meto helthikokka taanii haayotitharannee gaame aafuthar Godayis ootheeza.

²⁰ Ayidekka yi kara kara yinttan tamaarsittar yinttan maaddeezaypp pettibazikka pac-inchekkaya.

²¹ Taanii Ayihuditayisinnee Ayihude baazitayis nagarapp Xoossiko maaqqoday garkkennee nu Goda Yesuusa ammanoday garkk markatteeza.

²² «Ezayid tana abi hellodazako erooya, yhatti taanii Geeshsha Ayyaanas kiitinttii Yerusalaame yhanigiza:

²³ Zin Geeshsha Ayyanay achchinnee waaye tana naagizana katama ubbayid taas markkatteeza.

²⁴ Zin ta laaso polodayisnee Goda Yesuusapp ekkeez oosa, Xooss aadho keehatith Wonggile markkattiza poliza ta shemppato pathoowa baz garkk payidiza.

²⁵ «Taanii yhattekka Xooss kaatetith markkattitar yi ubbitay ganccer yuuyeeza. Yikkepp guye yinttipp oonkka tana be7aamana eriza.

²⁶ Yey gishos, yinttipp pettii as dhabikokka ta oycinttaamana yhayino yinttis milxi udii odiza.

²⁷ Xooss zore ubba yinttis abikka ashshekkazar odeeza.

²⁸ «Fa aaddas fa suuthar wozeez Xoossa woosa keetha naagoytta. Geeshsha Ayyanay yinttan wude henggizita udii shuumeez wudayisinee yi ubbayis naaginttoytta.

²⁹ Taanii yhanigeezaypp guye, wudayis qadhinttoowa iita pugitay yi gancce gelodana ta eriza.

³⁰ Ammanizita fa lassa kaalithiza worddo asita-maaritay yi ganccepp dendoda.

³¹ Yey gishos, taanii hayidzii laythi qammannee gallas aafuthar yinttan ommas ommas minthatheeza qoppittar naaginttoytta.

³² «Yhattekka yinttan minthodayis geeshsh asayir laatisodayis danda7iza Xoossisinee E aadho keehateth qaalayis yinttan hadara inggiza.

³³ «Taanii ooppekka bira woy worqqa woy aflag amottekkaya.

³⁴ Taanii ta kusher oothii tanannee taar yezita koshshiza baz maaddeeza yi, yi ommas eriza.

³⁵ Yi yhay garkk daaburii oothittar daabureezita maaddodayannee Goda Yesuusa, «Ekkizaypp inggizay anjjintteeza» geez qaala yi qoppodayis beeziza taanii yinttan ubba bazar beezeeza» yeegeeza.

³⁶ Phawuloosa yeya odii haasii u ubbitayira gulbatii Xoossa woosseeza.

³⁷ U ubbitaykka Phawuloosana idinggii yeekkitar yeereeza.

³⁸ E mahii, «Yhayinopp guye tana yi be7aamii» yeegeez qaalay untan iita azzantheeza. Unttii markkaba hellodayis eza moyizeeza.

21

Phawuloosa Yerusalaame qiteeza

¹ Nuunii Efesoonaa cimitaypp shaakintteezan garkk markkaber Qoose yhanigeeza. Wonttitha gallas Ruude hellii ezaypp Phaxira yhanigeeza.

² Piinqqe piinggiz markkabe denggii ezayid gelii yhammadayis denddeeza.

³ Nuunii Qoophiroosa be7eezan garkk, haddirss bagga ashshii Soora yhanigeeza. Markkabay fa caana ezayid wothodayis koyeez gishos Xiroosa yhanigeeza.

⁴ Ezayid ammaniza asita denggeeza untar laappun gallas betteeza. Phawuloosa Yerusalaame yhanggaamay garkk untii ees Ayyanar odeeza.

⁵ Nuunii untar bettiza woday wurin kezii yhanigeeza. Unttii ubbay fa machchitayrannee fa na7itayir pettii katamapp gaxa kessii nuna moyizeeza. Nuunii abba lanqqe bunqqittii Xoossa woosseeza.

⁶ Yeypp guye, woli sarothi nu markkabayid geleeza; untikka fa kara maaqqeeza.

⁷ Nuunii abbal afar oga haasii, Xiroosapp Phex-
elemasa helleeza. Ezayid ammaniza asita sarothi,
u kale pettii gallas peezheeza.

⁸ Wonttitha gallas kezii, Qisaare yhanigeeza.
Sabaake Filphoosa kara hellii e kale betteeza.
E Yerusalaame tiin doorintteez laappunitaypp
petta.

⁹ Filphoosas nabe maaqqeez oyddii wudir
na7itay yeza.

¹⁰ Nuunii unddenna gallas ezayid bettii yezin
Agaboosa giz nabay Yihudapp Qisaare ye7eeza.

¹¹ Nuuko yi7ii Phawuloosapp saqqa ekkii fa
kushannee fa toka accii, «Geeshsha Ayyanay yha
saqqay goda, Yerusalaame Ayihuditay yhay garkk
accii, Ayihude maaqqekka asayis aathii immada
yeegiza» yeegeeza.

¹² Nuunii yeya si7ii nuunnee ezayid yez asitay
Phawuloosa Yerusalaame yhanggaamay garkk
woosseeza.

¹³ Zin Phawuloosa mahii, «Yi yhay garkk
yeekkittar abis ta wozina shugishe? Taanii,
Goda Yesuusa sunthay gishos achch aadda baazin
Yerusalaame yhayqqodayisikka giigintteeza»
yeegeeza.

¹⁴ Nu zora E ekkaam ixxin, «Goday shene
maaqqo» yeegii si7ii geeza.

¹⁵ Ezayid xiqqa wode gam7eezaypp guye giig-
inttii Yerusalaame yhammadayis kezeza.

16 Qisaare yez ammaniza asitaypp xiqqitay nuur yhanigoytta geeza. Unttii nuunii shempodayis Minasoona giz Qoophiroosa athay kara kanggeeza. Minasoona tiin ammaneez asaypp petta.

Phawuloosa Yerusalaame helleeza

17 Nuunii Yerusalaame hellin ammaniza asay nuna ufayssar mokkeeza.

18 Wonttitha gallas Phawuloosa nuur wolla Yayqqoobako yhanigeeza. Woosa keeth cimitay ubbitaykka ezayid yeza.

19 Phawuloosa untan sarotheezaypp guye Ayihude maaqqekka asay gancce fa baggar Xoossii ootheezi bazita ubba untis odeeza.

20 Unttii yeya si7ii Xoossa galatii Phawuloosako yhay garkk yeegeeza: «Nu ishayyo, Ayihuditay gancce aappun mukulitay Xoossa ammaneezako ne bi7iza; untii ubbaykka higga miinthii naagiza.

21 Neenii Ayihude baazitay biitta yez Ayihude ubbay fa na7ita dookalamay garkk, Ayihuditay woga kaallaamay garkkennee Muse higga ixxoday garkk neenii taamarssizana Yerusalaame yez Ayihuditay si7eeza.

22 Yeezin abi lo77o? Neenii ye7itha tumakka u si7oda.

23 «Yey gishos, nuunii nees odizana si7oba; gatho yez oyddii asitay nu kale yeza.

24 Unttan ekkii untara geezhoba; ma untii fa omma meedinttoday garkk untis miishe inggoba. Unttii tiina nees si7eezay tuma baazannee neenii ne ubbaskka higge naagiza as maaqqeezana ubbay eroda.

25 «Zin ammaneez Ayihude maaqqekka asita maaqqiko, untii eeqas yarshintteez baz maamay garkk, suuth uzhaamay garkk, bawuta maamay garkkennee lagitaamay garkk, nuunii oda accii, untis dabddaabbe xaafeeza» yeegeeza.

26 Yeypp guye, Phawuloosa wonttitha gallas asita ekkii, yhanigeeza. E fa geezhiz gallasay ayide polinttodazako ersodayisnee fa yarshsho ayide yarshodazako erisodayis Xooss Keetha geleeza.

Phawuloosa aykintteeza

27 Laappun gallasay wurod hanodar, Iisapp ye7eez Ayihuditay Xooss keetha Phawuloosa bi7ii, as ubba denthithii Phawuloosa aykkeeza.

28 «Isreele asayyo, nuna maaddoytta; yha athay, nu higgannee yha Xooss Karana ixxoday garkk as ubba ubba aqo taamarssiza athay yhaya. Yeykka gidaam ixxin Ayihude baazita Xooss Kara gelssii, yha geeshsh aqa tuniseeza» yeegii uukkeeza.

29 Untii yeya geezay tiina Efesoona Xirofi-moosana Phawuloosar wola katamayid be7eez gishos yhatti Phawuloosa Xooss kara eza ekkii geleezbaz untis aazeeza.

30 Katama ubbay sharkkisharkeeza; asii ubbay shiiqii Phawuloosa aykkii Xooss Karapp goochchii bale kesseeza. Xooss Kara pengitay ellisii gord-dintteeza.

31 Asay Phawuloosa wodhod hanodar, «Yerusalaame katama kunithay buqqintteeza» giz oday Oroome shaalaqayiko helleeza.

32 Shaalaqay wottaddaritannee mato halaqita ekkii laasttar ye7eeza. Asay shaalaqannee

wottaaddarita bi7ii Phawuloosa yhadhdhizana ashsheeza.

³³ Ye wode shaalaqay shiiqii, Phawuloosa aykkii, nam77ii santhalaater acinttoday garkk azazeeza. Yeezii, E oonazakonnee ab udeezako asa oycceeza.

³⁴ Asaypp baggay yhaya gi uukkodar yhankkitay yeya gi uukkiza. Cabbotay dareez gishos shaalaqay tuma shaakkodayis danda7inttaam ixxin, wotaaddaritay Phawuloosa fa yeza aqo kanggoday garkk azazeeza.

³⁵ Phawuloosa yedhdhii kezeez detha hellodar as urqqithay gishos wotaaddaritay eza tookkeeza.

³⁶ Gaame asay, «E yhayqqo!» yeeгии ukkittar kaaliza.

Phawuloosa mootayis mahith inggeeza

³⁷ Wotaaddaritay Phawuloosa fa yeza aqo gelssod hanodar, Phawuloosa shaalaqayiko, «Ta nees pettibaz ododay garkk udodee?» yeegeeza.

E Phawuloosako, «Neenii Girike doona erinee?

³⁸ Neenii yhaypp tiina buqithi medhdhii shemppo wodhdheez oyddii mukule asita ekkii liizho gadha geleez Gibxxe athay nena baasa?» yeegeeza.

³⁹ Zin Phawuloosa, «Taanii, Kilqqa yez erint-teez Terssese katama as maagqeez Ayihude asii. Hayyana tana asayis odisooye?» yeegeeza.

⁴⁰ Shaalaqay eziko, «Odobaa» yeeгин Phawuloosa dethal afa eqqii, asay si77i goday garkk fa kusher maleeza. Asay si77i gin lbraysxe doonar yhay garkk yeegeeza:

22

¹ «Ta ishuntho, ta aduntho, taanii yhatti yinttis inggiza malssa si7oytta.»

² Phawuloosa untis Ibraysxe doonar odiza si7ii kaseesaypp aathii si7ii ateeza. E yeegeeza,

³ «Taanii Kilqqa yez Xerseese yelinttii yha katamayid dicceza. Ta asitamaaraykka Gamaalale; taanii nu aditay higga miinthii tamaareeza, yhayino yi ubbay hanizay garkk Xoossayis mishinttiza Ayihude asii.

⁴ Taanii yha oga kaalliza maachchitayinnee dhi-irathita aykkii achch keetha olittarannee untan wodhisod hellodayis meto beezeez asii.

⁵ Yey garkkekka, qeese halaqaynnee Shanggo ubbay tabaz markkattodayis danda7iza. Taanii Damasqqo yez u ishitayis untapp dabddaabbe ekkii ezayid yez asitay acinttii seerinttod garkk Yerusalame ko7odayis yhanigeeza.»

⁶ «Taanii yhanigii Damasqqo hellodar seeta gallas qoppekka salopp gita poo7o ta kalayir poo7eeza.

⁷ Taanii sa7a pokkii yezin, «Saa7oola, Saa7oola, tana abis bayi7inee?» giz qaala si7eeza.

⁸ Taanii mahii, «Godayyo, neenii oonoo?» yeegeeza.

«E mahii, «Taanii, ne bayi7ithiz Naazirete Yesu-usa» yeegeeza.

⁹ Taar yezitay poo7a be7eezaypp attin taas odiza qaala si7ekkaya.

¹⁰ «Taanii, «Godayyo, ta ab udo?» yeegeeza.

«Goday taako, «Denddii Damasqqo yhanigoba. Ne udoday garkk Xooss qoppeezibaz ubba baz ezayid nees odinttoda» yeegeeza.

¹¹ Ye wolqqama poo7aypp denddeezayid ta aafay be7aam ixin, taar yez asitay ta kusha aykkii, tana goochchin Damasqqo helleeza.

¹² «Damasqqo yez Ayihude ubbay unddenna bonchchiza pettii Hanana giz athay, nu higga bonchchizayntee Xoossa miinthii woossizay yeza.

¹³ Hanana taako yi7ii, ta kale eqqii, «Ta ishayyo Saa7oola, bo7oba» yeegeeza. Ellisii taanii eza be7o aykkeeza.

¹⁴ «E taako, «Nu aditay Xoossay neenii e shene eroday garkk, xilla be7aday garkkennee e doonapp qaala si7oday garkk tiinatii nena dooreeza.

¹⁵ Ne be7eezbazinnee si7eez baz as ubba tiina ees markka maaqqoda.

¹⁶ Yhatti abis gam7ee? Denddii xammaqintoba; e suntha xegittar ne nagaraypp meecintoba» yeegeeza.

¹⁷ «Taanii guye Yerusalaame maaqqii Xooss keetha woosodar, taas qonccithii bentteeza.

¹⁸ Qonccithar Goday taako, «Ne taas markkattiz markkatitha asay ekkaka gishos ellisii Yerusalaamepp kezoba» yeegodar ta be7eeza.

¹⁹ «Taanii, «Godayyo, Ayihude Woosa Keeth ubbayid nena ammanizita aykkii yadhdheezannee achch kara oleeza untii eriza.

²⁰ Untii ne markka Isxifaanose wodhodar taanii ye odayid asayir tobbeeza. Ma u kale eqqii eza wodheezitayis ma7o naagiza» yeegeeza.

21 «Goday taako, «Taanii nena Ayihude maaqqekka asayiko haakko aqo kiitteezay gishos denddii qitoba» » yeegeeza.

Phawuloosa Oroome as maaqqeezana qonciseeza

22 Phawuloosa ye qaala odii haasod hellodayis asay E giza si7iza. Yeypp guye, fa qaala dhoqq udii, «Yhaya biittaypp dhabisoba! E shemppor yezodayis beezooya» yeegeeza.

23 Unttii uukkittarannee, fa ma7o afa dakkit-tarannee baana afa denthodar;

24 Shaalaqay bi7ii wotaaddaritay Phawuloosana u fa yeza aqo kanggoday garkk azazeeza. Ma asay abis yey garkk uukkizako erodayis koyii Phawuloosa alanggar garafii pilagoday garkk untan azazeeza.

25 Zin wotaaddaritay Phawuloosa dafer minthii accii garafod hanodar Phawuloosa fa kale eqqeez mato halaqitayiko, «Oroome as pirda bayith garafizay yinttis woga?» yeegeeza.

26 Mato halaqay yeya si7ii shaalaqayiko yhanigii, «Yha athay Oroome asii. Neenii ab oothodayis qoppeene?» yegii oycceeza.

27 Shaalaqay Phawuloosako shiiqii, «Neenii Oroome aso? An taas odoba» yeegeeza.

Phawuloosa, «Ee» yeegeeza.

28 Shaalaqay mahii, «Taanii yha gadgetitha gaame miisher wonggeeza» yeegeeza.

Zin Phawuloosa, «Ta yha gadgetitha yeletithar denggii ekkeeza» yeegeeza.

29 Yey gishos, Phawuloosa pilagodayis qoppee-itay izir epp shaakintteeza. Shaalaqay Oroome as maaqqeezana erii acciseezayis yashshitteeza.

Phawuloosa Ayihude shanggo tiina shiiqeeza

³⁰ Wonttitha gallas Shaalaqay, Ayihuditay Phawuloosa abis mooteezako geeshshii erodayis koyeeza. Qeese halaqitayinne shanggo ubbay shiiqoday garkk azazeeza; ma Phawuloosa achchapp bili7isii u tiina esseeza.

23

¹ Phawuloosa shanggana dakkii bi7ii, «Ta ishuntho, taanii yhayino hellodayis Xooss tiina ta yess ubbayid lo77o wozinar yeza» yeegeeza.

² Qeese halaqay Hanana, Phawuloosa doonate baqqoday garkk e kale eqqeezana azazeeza.

³ Ye wode Phawuloosa eeko, «Naati ne borshontto tizheez gabbara aazizayo, Xoossay nena baqqoda. Neenii taal afa higge garkk pirdodayis bettii higge menth tana baqqoday garkk kiittinee?» yeegeeza.

⁴ Phawuloosa kantta eqqeezitay eeko, «Ne Xooss qeese halaqa cazhinee?» yeegeeza.

⁵ Phawuloosa, «Ta ishuntho, E qeese halaqa maaqqeeza ta erekkaya; abis giiko Xooss qaalayid, «Ne woya aqisizayil afa iita qaala odippe» ginttinttii xaafintteeza» yeegeeza.

⁶ Zin Phawuloosa ye aqayid yez asaypp baggitay Saduqaawita, baggitay Ferisaawita maaqqeezana erii, «Ta ishuntho, taanii Ferisaawennee Ferisaawe na7a; «yhayqqeezitay yhayiqopp dendoda» gi taanii ufayisar naagiza gishos untii taal afa pird diza» yeegii odeeza.

⁷ Phawuloosa yeya geez wode Ferisaawitay gancennee Saduqaawitay gancce kachchii kezin shaakintteeza.

⁸ Abis giiko, Saduqaawitay, «Yhayqqeez as den-dooya; kiitanchchoka ayyankka baaya» yeegiza. Zin Ferisaawitay ubbakka ammaniza.

⁹ Ola uufo keseeza; Ferisaawitay bagga maaqqeez higge asitamaaritay denddii eqqii, «Yha athayil afa aba buutakka dengeekkaya; ees ayyana woy kiitanchchay odo antenna» yeegii palameeza.

¹⁰ Kachchay mee7ith aykkin asay Phawuloosa shaqirchchaamaygarkk gi, shaalaqay fa wotaad-daritay wodhdhii untan ganccepp eza ellisii kessii u fa yeza aqo kangodaygarkk azazeeza.

¹¹ Ye qamma Goday Phawuloosa kale eqqii, «Phawuloosa, neenii taas Yerusalaame markkat-teeza Oroomekka markkattodayis beeziza; ming-goba; akko baaya» yeegeeza.

Phawuloosana wodhodayis maqintteeza

¹² Wonttitha gallas Ayihuditay, «Phawuloosana wodhekazar katha maamii haath uzhaamii» gi caaqqeeza.

¹³ Phawuloosal afa yeya maaqqintteez asitay oytamapp gaame.

¹⁴ Unttii qeese halaqitaykonnee gade cimatayko yhanigii, «Nuunii Phawuloosa wodhekkazar katha gizibaz maamii gi caaqqeez.

¹⁵ Yikkee, yinttan shanggay ebaz geeshshii pilagodibaz yez aazisii, Phawuloosa yinttiko ko7oday garkk shalaga oycoytta. Nuunii E yha

shiiqo hellodaypp tiina eza wodhodayis giigii betteeza» yeegeeza.

¹⁶ Zin Phawuloosa mishii na7ay ye maaqqintta si7ii yhanigii wotaaddaritay yeza aqo gelii, Phawuloosas odeeza.

¹⁷ Phawuloosa mato halaqitaypp petta xeezii, «Yha na7ay shaalaqayis odiza baz yeza gishos eza shalaqayko kangoba» yeegeeza.

¹⁸ Mato halaqay na7a shaalaqayiko kangii, «Achch kara yez Phawuloosa tana faako xeezii, yha na7ay nees odiza baz yez gishos eza neeko ko7oday garkk tana woosseeza» yeegeeza.

¹⁹ Shaalaqay na7ay kushayid aykkii, duma bale kessii, «Neenii taas ododbazay abba?» yeezii oyc-ceed.

²⁰ Na7ay shaalaqayiko, «Ayihuditay Phawuloosa bagga kasepp miinthii pilagodayis koyeezi baz aazisii neenii wontta eza shiiqo ko7oday garkk nena woossodayis zore acceeza.

²¹ Zin neenii untii gizibaz si7ippe. Abis gi-iko, oytamapp gaame asitay Phawuloosa wod-hekkazar «Katha maamii, haathe uzhaamii» gi caaqii, qosinttii eza naagiza. Yhatti ne gizibaz aadda si7odayis naagiza» yeegeeza.

²² Shaalaqay mahii, «Yhaya ne taas odeezana hara ooskka odippe» yeezii na7a guye dakkeeza.

Phawuloosana Filkkiseko dakkeeza

²³ Shaalaqay mato halaqitaypp nam77ita xeezii, «Qammapp hayidzii saater Qisaare yhanigodayis, nam77ii xeet wotaaddarita, laappun tam para asitannee nam77ii xeet tooranchchita giigisoytta.

24 Gade aqisiza Filkkisako Phawuloosa saror helloday garkk toga mehita giigisoytta» yeeгии u azazeeza.

25 Shaalaqay Filkkisas yhay garkk giz dabddaabbe xaafeeza:

26 «Qalawudoosa Lusosappe gade aqisiza bonchcho Filkkisas, saro nees maaqqo.

27 Ayihuditay yha atha aykkii wodhod hanodar, E Oroome gade as maaqqeezaya erii wotaaddaritayira hellii eza ashsheeza.

28 Ta Unttii eza abis mootizako erodayis koyii unttan u shanggitayiko eza shiisheeza.

29 Unttii fa higgayis eza mooteezaypp attin eza wodhisizabaz woy acisizibaz baza ta denggeeza.

30 Unttii yha athayil afa maaqqintteez zigirssay tana hellin, taanii ellisii eza neeko dakkeeza. Eza mootizitay ne tiina yhanigii mootoday garkk azazeeza» yeegeeza.

31 Yey gishos, wotaaddarita azazeezay garkk Phawuloosa ekkii, qamma Antiphaxirisa helitheeza.

32 Wonttitha gallas paar asitay eza ekkii yham-maday garkk ashshii toke asitay guye maaqqeeza.

33 Togar yez asay Qisaare hellii dabddaabbe gade aqisizayis inggii, Phawuloosana e tiina shiisheeza.

34 Gade aqisizay dabddaabba nabbabeezaypp guye «Phawuloosa, ne aba awurajja aso?» gi eza oyiceeza. E Kilqa as maaqqeezaya erii

35 «Taanii nena mootizitay yi7iko ne giza si7oda» yeegeeza. Wotaaddaritay Phawuloosa Herodoosa zabba naaginttoday garkk azazeeza.

24

Phawuloosa ayihuditay mooteeza

¹ Ichchin gallasappe guye qeese halaqay Hananee, cimitayirannee Xerxeluusa giz pettii afakatayir wolla Qisaare qiteeza. Unttii gade aqisizayil afa Phawuloosana mooteeza.

² Phawuloosa xeeqinttii geleez wode Xerxeluusa eza yhay garkk yeegii mooteeza:

«Bonchcho Filkkisa, nuunii ne baggar unddenna sarotith denggeeza, ne lo77o aqisayid nu biittay unddenna laamintteeza.

³ Bonchchintteez Filkkisa, nuunii abakka ayidekka maaqqin unddenna galatar yeya ekkoda.

⁴ Taanii nena gam7isekkazar neenii ne kee-hetithayir nubaz eller si7od garkk nena woosiza.

⁵ Yha athay dhube maaqqii gade ubbayid yez Ayihuditay gancce cabbo medhdhii Naazirawitay bagga asa kaalithiza maaqqeezana nu ereeza.

⁶ Hara attozin, Xooss Kara tunisod hanodar nu eza aykkeeza; nu higgay gizay garkk ezal afa pirdododayis qoppeeza.

⁷ * Zini shalaqa Luusiyosa yi7ii, wolqqar nu kusheppe eza kessii ekkeeza.

⁸ Ezar mootinttizitaykka neeko ye7od garkk azazeeza. Neenii ne ommas yha atha pilagii nu eza mootiza moota ubba erodayis danda7iza» yeegeeza.

⁹ Ayihuditaykka, «Yha oday tuma» gi e qofa ma7eeza.

* **24:7** Payido 24:6 nu higgay gizaypp aykkii payido 24:7 gujjii yhanigii 24:8 bagga hellodayis yezay pettii pettii Girike maxaafitayid baaya.

Phawuloosa mootayis mahith inggeeza

¹⁰ Gade aqisizay Phawuloosa odod garkk mallin Phawuloosa yhay garkk yeegi maheeza: «Neenii unddenna wodepp aykkii, yha asayis pirdittar yezana erii taanii odayis ufayssar mahith ingiza.

¹¹ Taanii goynnodayis Yerusalaame kezin taph-pho nam7i gallasapp aadhoozana neenii ne om-mas erodayis danda7iza.

¹² Ayihuditay tana Xooss kara maaqqin Ayihude Woosa kara maaqqin katama maaqqin oorakka palamodar woy as shiishii saro dhabisodayis tob-bodar pettii asikka tana denggekkaya.

¹³ Yhattekka untii tana mootizabazayis markka denggodayis danda7ooya.

¹⁴ «Zini taanii pettibaz ammaniza; taanii higger yezabazinnee nabitay xaafeez ubba baz ammanii, nu aditay Xoossa, untikka worddo giz ogayir ta goynniza.

¹⁵ Untii fa aaddas ammanizay ta garkk xillitayinnee xillobaazitayikk yhayiqopp dendodana taakka ammaniza.

¹⁶ Yey gishos, taanii Xooss tiinannee as tiina ubba wode lo77o kaha taas yezoday garkk miing-giza.

¹⁷ «Taanii Yerusalaameppe kezeezaypp unddenna laythapp guye ta dabo manqqitayis maadee immadayisinnee yarshsho yarshshodayis Yerusalaame yhanigeeza.

¹⁸ Taanii Xooss kara yeya udii qasho woga polii maaqqin tana denggeeza. Ye wode taara gaame woya baaya, kachchikka kezekkaya.

19 Zini Iisapp ye7eez pettii pettii Ayihuditay eza-yid yeza; untii taal afa oda koykko yi7ii tana neell afa mootodayis danda7iza.

20 Woy taanii shanggo tiina shiiqeez wode oothiez buuta yeziko yhayititay ne tiina yezitay odo.

21 «Taanii u gancce eqqii, yhayqqeezitay den-doda» gi uukkii odeez gishos yhayino yi tiina pirdas shiiqeeza, yeypp hara baz oothekkaya» yeegeeza.

22 Zini Filkkisa Goday ogay bagga geeshshii ereez gishos «Taanii yi oda gachcheeza» yeegii woda adusiseeza.

23 Mato halaqay Phawuloosana naagttar maaddod garkkennee e dabbitaypp oonkka oycodayis ye7odar kayaamay garkk mato halaqayis azazeeza.

Phawuloosa Filkkisa tiinannee Dirusilla tiina shiiqeeza

24 Xiqqa gallasapp guye, Filkkisa Ayihude bagga maaqqeez fa machchat Dirusillara yi7ii Phawuloosa kiittii ki7isii Kiristtoosa Yesuus ammano bagga eepp si7eeza.

25 Phawuloosa xillotithi bagga, fa ubba aqiso bagganee ye7odayis yez pirda bagga ododar, Filkkisa yashittii, «Neenii yhattes qitoba taas gi-gieez wode nena xeegisoda» yeegeeza.

26 Ye wode Phawuloosapp gubbo ekkodayis qoppi eza mahii mahii xeeгии erii odinttiza.

27 Nam77ii laythapp guye, Filkkisa aqana Phorqqiyoda Fisxoosa ekkeez. Filkkisa

Ayihudita ufayssodayis kezii Phawuloosa billekka ashsheeza.

25

Phawuloosa Oroome Kaatayis aatho warqqate

¹ Fisxoosa fa aqisiza awurajja gelii hayidzintho gallasapp guye Qisaarepp Yerusalaame kezeeza.

² Ezayid qeese halaqitayinnee Ayihuditay bayir-itay Phawuloosa mooteeza.

³ Phawuloosana Yerusalaame ko7or paas lo77o baz oothoday garkk gi Fisxoosana u woosseeza. Yeyakka geezay ogell qosinttii eza wodhodayis untis giigoday garkke

⁴ Fisxoosa untiko, «Phawuloosa, Qisaare achch kara yeza; taanii ta ubbaskka ellisii ged guye maaqqad haniza.

⁵ E buuteezbaz yezako yi gancce mawuter yez-itay taar Qisaare yhanigii eza mooto» yeegii maheeza.

⁶ Fisxoosa u achcha hosppun woy taphphii gallas garkk gam7eezaypp guye Qisaare qiteeza. Wonttitha gallas pirda oydel bettii Phawuloosa ko7oday garkk azazeeza.

⁷ E yi7in Yerusalaamepp ye7eez Ayihuditay e kalayid eqqii untii lathodayis danda7oowa deexo mooto shiisheeza.

⁸ Phawuloosa mahii, «Taanii Ayihude higga maaqqin Xooss Kara woy Oroome Kaata Qeesarekka qohekkaya» yeegeeza.

⁹ Zin Fisxoosa Ayihudita ufayssodayis kezii Phawuloosako, «Yerusalaame yhanigii yha mootay-bagga ezayid ta tiina pirdinttodayis koyinee?» yeegii oycceez.

¹⁰ Zin Phawuloosa, «Taani pirddinttodayis beez-iza Qeesare pirdde keetha eqqeeza. Neenii lo7ithii erizay garkk taanii Ayihudita abarakka qohekkaya.

¹¹ Yikkee, taanii qoheezibaz yhayiqoskka helth-iza baz buuta ootheetzibaz maaqqiko yhayiqopp tana ashshoba gamii. Zin untii tana mootiza mootay cere maaqqiko oonkka tana untis aathii inggodayis danda7ooya. Qeesare tabaz pirddo gi oycciza» yeegeeza.

¹² Ye wode Fisxoosa fa zoranchchitayira zorinttii, «Neenii Qeesare tabaz pirddoba gi oycceeza; Qeesareko yhanigiza» yeegii maheeza.

Phawuloosa Agirpha tiinannee Barnniqe tiina shiiqeeza

¹³ Xiqqa gallasapp guye Kaatay Agirphannee Barnniqe Fisxoosa sarothodayis Qisaare yhanigeeza.

¹⁴ Ezayid untii unddenna gallas gam7in, Fisxoosa Kawayis Phawuloosa bagga yhay garkk yeegii odeeza; «Filkkisa billekkashshii yhanigeez pettii athay yhaydda yeza.

¹⁵ Taanii Yerusalaame yhanigeez wode qeese halaqitayinnee Ayihude cimitay ezal afa pirdoday garkk tana woossii ebaz taas odeeza.

¹⁶ Taanii, «Mootinttiza athay tana mootizitay tiina eqqii fana mooteezbazayis mahith inggekkazin, oona maaqqikokka aadhii ingginttizay Oroome woga baaya» yeegii untis maheeza.

17 «Yey gishos, untii yhaydda shiiqeez wode taanii gam7ekka wonttitha gallas pirdde keeth gelii Phawuloosa ko7oday garkk kiiteeza.

18 Eza mootizitay e kanttar mari eqqii, iitabazar eza mooteikka ashshenna gi taanii qoppeezay garkk eza mooteekkaya.

19 Zin untii fa ammano baggannee Phawuloosa, «E Path yeza» giz yhayqqeez Yesuusa gintinttiz athay bagga ezar palamizaza.

20 Taakka yha oda shaakkodayis metitheez gishos Phawuloosa Yerusalaame yhanigii, ezayid pirddinttodayis koyizako gi eza oycceeza.

21 Zin Phawuloosa fa oda Qeesare billod hello-dayis achch keetha gam7odayis oycceeza. Taanii eza Qeesareko dakkod hellodayis E acinttoday-garkk kiiteeza» yeegeeza.

22 Yey gishos, Agirpha Fisxoosako, «Taanii ta ubbaskka ye athay gizibaz si7odayis koyiza» yeegeeza.

Fisxoosa eeko, «Neenii wontta E gizibaz si7oda» yeegeeza.

23 Wonttitha gallas Agirphannee Barnniqqe gita bonchchor shaalaqitayrannee katama yez wolqqama asitayir yi7ii pirdde keetha geleeza. Fisxoosa Phawuloosa xeegisii ke7eeza.

24 Fisxoosa, «Kaat Agirpha, yhaydda nuur yez asitayyo, Ayihuditay Yerusalaamekka yhaygarkk uukkii, «E yikkepp guye path yezodayis beezooya» yeegii, tana woosseez atha yhaya yi bi7iza.

25 Zin eza yhayiqos helthiza baz abikka taanii denggekkaya. E fa ommas, «Qeesare tabaz pirddo yeegii oycceeza» geez gishos Qeesareko eza dakkodayis qofa acceeza.

²⁶ Taanii ebaz ta kaat Qeesaares xaafisiza oge abikka baaya. Yey gishos, ebaz yi bi7iko ta xaafizay benttodazako gi yi tiina ubbarakka Kaat, Agirpha, ne tiina eza ke7eeza.

²⁷ Abis giiko, acintteez as dhooqqa daynnas aathitar E abis mootintteezako erisekkazar ashshizay taas boozetith aaziza» yeegeeza.

26

Phawuloosa Agirpha tiina inggeez mahith

¹ Agirpha Phawuloosako, «Neenii ne bagga ododayis danda7iza» yeegeeza. Ye wode Phawuloosa fa kushe denthii yhay garkk yeegeeza:

² «Kaat, Agirpha, Ayihuditay tana mooteez baz ubbayis mahith inggodayis yhayino ne tiina eqqitar ta anjay lo77o gi qoppiza.

³ Yeykka neenii Ayihude wogannee palama ubba loythii eriza yeyi gishos tana danda7ar si7oday garkk ta nena woosiza.

⁴ «Taanii na7atithapp aykkii ta asay gancceannee Yerusalaame yezeez ta yessa Ayihude ubbay eriza.

⁵ Taanii tiinapp aykkii, nu ammano wogga miinthii naagiza Ferisaawitay baggaypp maaqqeezana untii markkattodayis koykko eriza.

⁶ Yhattekka taanii Xooss nu aditayis inggod geez ufayssa naagiza gishos mootinttii yhaydda eqqeeza.

⁷ Ma taphpho nam77ii nu aditay sheeshay Xoossa qammannee gallas miinthii goynnittar Xooss inggod geeza ekkodayis ufayisar naagiza.

Kaat Agirpha, Ayihuditay tana mootizay taanii ufayisar yeya naagiza gishos.

⁸ Xooss yhayqqeezita denthezaya maaqqeezay yi kantta abis ammaninttoosa?

⁹ «Binii taanii ta ubbaskka Naazirete Yesuusa suntha ixxiza danda7intteezbaz ubba oothodayis beeziza gi qoppeeza.

¹⁰ Taanii Yerusalaame ootheezay yhaya. Qeese halaqitaypp mawute ekkii Xoossa asitaypp gaamita aciseeza. Unttan wodhodar u yhayqqodana ta doseeza.

¹¹ Gaame wode Ayihude Woosa Keeth ubbayid untii seerinttoday garkkennee Yesuusana cazhoday garkk ta woxiteeza. Taanii aqopp aathii untan kacceeza hara attozin, hara biitta katamita hellodayis yhanigii ta untan bayi7itheeza.

¹² «Taanii yha odayis qeese halaqitapp mawutennee kiita ekkii Damasqqo yhanigiza.

¹³ Kaatayyo, taanii seeta gallas ogell yezin awa poo7opp lo7ithii aadhiz poo7o ta yuushayirannee taara yhanigizitay yuushayir salopp poo7odar be7eeza.

¹⁴ Nuunii ubbaykka sa7a pokkeezin Ibraysxe doonar, «Saa7oola, Saa7oola, tana abis bayithinnee? Neenii nena caddiza biraata qakkiko nena qohiza» yeegii taas ododar si7eeza.

¹⁵ «Taanii, «Godayyo, neenii oonoo?» yeegeeza.

«Goday, «Taanii, neenii bayi7ithiz Yesuusa;

¹⁶ zin denddoba. Yhayino neenii be7eezayppennee tiinapp ta nena beezodana haras markkattoday garkk taas oosanchcho udii nena shuumodayis nees ta benttoda.

¹⁷ Isreele asitayppennee taanii nena unttika kiittiza Ayihude baazitaypp nena ashshoda.

¹⁸ Neenii u aafa dooyoday, dhumapp poo7oko, Xalahe kushepp Xoossiko unttan mahoda. Unttii tana ammanii nagara atotith ekkoda. Xooss geeshsheez asay gancce fa laata denggoda» yeegeeza.

¹⁹ «Kaat Agirpha, yey gishos, taas salopp bentteez qonccithayis kiitintteeza.

²⁰ Zin taanii tiinatii Damasqo yezitay yeypp guye Yerusalaammennee Yihuda biita ubbitayid yezitayinne Ayihude baazitaykka fa nagarapp Xoossiko maaqqoday garkkennee nagaraypp maaqqodayis beeziza ooso oothod garkk qaala odeeza.

²¹ Yey gishos, Ayihuditay tana Xooss kara aykkii wodhodayis koyeeza.

²² Yhayino hellodayis Xooss maadee taapp shaakinttekkaya; yey gishos, xiqqitaysinne dammitayis markkattittar yhaydda eqqeeza. Nabittaynnee Muse hanoda gi odeezaypp hara pettibazikka taanii odeezibaz baaya.

²³ Yeykka, «Kiristtoosa waaye ekkodayis beeziza; ma yhayiqopp tiina denddii Ayihuditayisinne Ayihude baazitayis poo7o beezodayis ees beeziza» geeza» yeegeeza.

²⁴ Phawuloosa yeya yeegii mahodar, Fisxoosa fa qaala dhoqq udii, «Phawloosa, ne eeyeeza; ne gaame timirttay nena eeyisoss heltheeza» yeegeeza.

25 Zin Phawuloosa, «Bonchcho Fisxoosa, taanii tumabazinnee beeziza baz odizapp attin eeyekkaya.

26 Taanii qoncce odiza oda Kaatay eriza. Yha oday geema oosinttekka gishos pettakka eebb qos-inttii attamaya taanii lo7ithii eriza.

27 «Kaat Agirpha, neenii nabita ammaninnee? Neenii untan ammanizana taanii eriza» yeegeeza.

28 Kaatay Agirpha, Phawuloosako, «Yha xiqqa saatayid tana Kiristaanee mahodayis koyinee?» yeegeeza.

29 Phawuloosa, «Gaame wode maaqqin xiqqa wode ne aadda baazin yhayino ta oda si7iz ubbay yha achchaypp attin ta garkk maaqqoday garkk ta Xooss woosiza» yeegeeza.

30 Yeypp guye, Kaat Agriphpha, gade aqisiz Fisxoosa, Barnniqennee untar betteez ubbitaykka dendeenza.

31 Yeypp kezii yhanigttar pettay pettayir, «Yha athay yhayqqos woy achchis helthiza baz akkokka oothekkaya» yeegii odintteeza.

32 Agirpha Fisxoosako, «Yha athay (Qeesare tabaz pirddo) geekazako bilinttodayis danda7izazin atteeza» yeegeeza.

27

Phawuloosa Oroome qiteeza

1 Nuunii markkaber Ixaale dakkodayis u murtteez wode kaatitay kaat wotaaddarita ginttinttizitaypp pettii Yuuliyoosa giz mato halaqayis Phawuloosannee hara xiqqa achch asita inggeeza.

² Iisa lanqqe yez heerita yhanigodar Adiramixoosa markkabe gelii denddeeza. Maqadoona as maaqqeez Teselonqqe Arsxirokoosa nuur yeza.

³ Wonttitha gallas nuunii Sidoona hellodar, Yuuloosa Phawuloosas qadhinttii fa laggitayko yhanigii koshshiza baz maadinttoday garkk unt-tiko dakkeeza.

⁴ Yeypp denddii nu tiinar carkkiza gishos haathar teqintteez biitta, Qoophiroosar miyithii aadheeza.

⁵ Kilqqannee Phinfilä yez abba piinggii Luqa yez Muura helleeza.

⁶ Ezayid mato halaqay Ixaale yhanigiz Iskkind-dire markkabe denggii, ize nuna geliseeza.

⁷ Nuunii gaame gallas loddera yhanigii, gaame un7ar Qanddoosa katama kale helleeza. Ezayir yhanigodayis nuna carkko kayin Salmoonar aad-hii haathar teqintteez biitta, Qarxeesa miyithii aadheeza.

⁸ Gaame metor gaxa gaxa aykkii Laasa katamas ukke yez lo77o ginttinttiz markkabe shemppiza heera kezeeza.

⁹ Nuunii ezayid unddenna wode gam7eezaypp guye xooma wode aadheez gisho, markkaber yhamo metiza gishos Phawuloosa untan zoreeza.

¹⁰ «Yinttanno asitayyo, nu yhamay gita dhabon-nee gaame qoho yezay taas benttiza; qohay caanal afannee markkabel afa aadda baazin nu shemp-payil afakka helloda» yeegeeza.

¹¹ Zin mato halaqay Phawuloosa geezaypp aathii markkaba laaggizayinnee markkaba goday giza ammaneeza.

¹² Ye abba doonar yez katamay balggo agina aathodayis unttis giigekka gishos gaame asitay paas danda7inttiko Finqqe katama hellii balggo agina ezayid aathodayis zorintteeza. Finqqe awa gelos pude baggappennee awa gelopp sulle baggas gancce abba kantta yez markkabe eqqii caan wodhisiz aqo.

Abbal afa gote dendeenza

¹³ Kawushsha sulle carkko loddar carkkeez wode fa qoppeezay garkk haneezibaz aazin dendi, markkabe eni7aamay garkk aykkiz biraata udee ekkii Qarxeesa kanttar aadheeza.

¹⁴ Zin gaame gam7ekkazar «Awuraqisa» giz wolqqama gote haathar teqintteez biittapp sulle untal afa dendeenza.

¹⁵ Ye gotay markkaba urqqii yhamo kayeez gishos carkkay markkabay fa doseez oge kanggo-day garkk ashshii ashsheeza.

¹⁶ Nuunii Qeeda giz haathar teqintteez biitta miyithi yhanigttar gaame metinttii markkabitt wogolito aykkii ashshodayis danda7eeza.

¹⁷ Unttii wogola pude kesseezaypp guye wodoror markkabayil afa xaaxii, miinthii acceenza. Sirtiisa giz shafel domi7inttoda gi hirgii, markkabe shaara wothii markkabay cere laaginttod garkk dakkii ashsheeza.

¹⁸ Gotay wolqqamittar yhanigin wonttitha galas caanaypp bagga abba gancce olo aykkeeza.

¹⁹ Hayidzintho gallas markkabe miishe ekkii nu kushayir dhugeeza.

²⁰ Nuunii gaame gallas awannee xoolintto be7ekkazay gishonnee wolqqama carkko nuul

afa minggeez gishos tiinapp shemppor attoda gi qoppekkaya.

²¹ Ye wode untii unddena gallas katha meekka gam7eez gishos Phawuloosa u gancce denddii eqqii, «Asitayyo, yi ta zora ekkii Qarxeesepp denddekkazako yha metaynnnee qohay nuna hel-laamizin.

²² Zin taanii yinttan yashittippate gi zoriza; abis giiko, yha markkabay dhabodaypp attin yinttipp pettii as shemppokka dhabenna.

²³ Zin qamma ta ebaz maaqqeezayinnee ta goynniza Xoossay kiitteez kiitanchchay ta kale eqqii,

²⁴ «Phawuloosa, yashittippe; neenii Oroome Kaatay Qeesare tiina eqqodayis beeziza. Yeezako Xooss ne gishos neer yhanigizita nees inggeeza» yeegeeza.

²⁵ Yey gishos, asitayyo, yashitippate. Ye ki-itanchchay taas odeezay hanodana taanii Xoossal ammaninttiza.

²⁶ Zin carkko nuna kanggii pettii haathar teqint-teez biitta gaxa oloda» yeegeeza.

²⁷ Taphpho oyddantho gamma Adira Abba nuna carkkay gedennee yhana urqqodar, gidii bilahe maaqqeez wode markkabe oothizitayis bi-ittako ukkeeza aazeeza.

²⁸ Unttii ciimmotitha erodayis koyii wodoro xeera deexizabaz accii abba gancce olin, abbay hosppun tam yhadha maaqqeeza. Xiqqa gam7ii, mahii olin usuppuntam yhadha maaqqeeza.

²⁹ Unttii abba gaxa yez shuchchar domi7nttamay garkk yashittii, markkabay yhanggaamay garkk aykkiz oyddii biraatita

markkabaypp guyer abba olii, sa7a wonttoday garkk Xooss woossiza.

³⁰ Markkabel oothizitay markkabaypp woxxi kezii, markkabay yhanggaamay garkk aykkiz bi-raatita markkabaypp tiina baggar abba oliza aazin wogola abba gancce oleeza.

³¹ Phawuloosa mato halaqaykonnee wotaad-daritayiko, «Yeyititay markkabayid shemppii bet-tam ixiko yi attodayis danda7oowa» yeegeeza.

³² Yey gishos, wotaaddaritay wogolay accint-teeza wodora gachchii dakkii ashsheeza.

³³ Sa7a wonttod hanodar ubbitay kath maaday garkk Phawuloosa asayiko, «Yi katha meekka naagttar yhayinor taphpho oyddii gallas gam7eeza.

³⁴ Yey gishos, xiqqa katha yi maaday garkk ta yinttan woosiza. Yinttis lo77o maaqqada; hara attozin yi omma binanaypp pettakka dhabaamii» yeegeeza.

³⁵ Phawuloosa yeya gi boora ekkii ubbay tiina Xooss galateeza; baxxi muntta aykkeeza.

³⁶ Ubbay miinggii fa ubbas katha ekkii meeza.

³⁷ Nuunii markkabayid yezitay nam77ii xeetan-nee laappun tam usuppun.

³⁸ Unttii mi mizheez wode caaneez gistta abba gancce olii markkabay deexa shawukiseeza.

Markkabat meqqeeza

³⁹ Sa7a wonttin markkaba oosanchchitay aba helleezako erekkazar, abba gaxa yez shafennee silima be7eeza. Paas danda7inttiko markkaba ye silimayiko shiishodayis qoppeeza.

⁴⁰ Yeezii, markkabay yhanggaamay garkk aykkiz biraatita bili7i abba gancce oleeza. Ye wode laaggiza mitha acciz wodora bili7eeza. Yeypp guye, carkkay markkaba tiina urqqoday garkk markkaba kanggiza shaara tiina baggar dhooqi udii yhamo aykkeeza.

⁴¹ Zin markkabay shafe dethar domi7inttii mit-intteeza. Markkabayis tiina baggay mooginttii eni7aam ixxin, guye baggay zulo urqqithaypp dendii meqito aykkeeza.

⁴² Wotaaddaritay achch asaypp pettakka haatha yhadhdhii kezaamay garkk untan wodhodayis tobbeeza.

⁴³ Zin mato halaqay Phawuloosa ashshodayis qopp wotaaddaritay tobbi ixeeza. Haathe yhadho eriza ubbay markkabaypp haathayid doonggii doonggii wodhdhii tiinatii gaxa kezoday garkk azazeeza.

⁴⁴ Atteezitay sanqqal afannee, markkabe meqayil afa kezoday garkk azazeeza ubbay gaxa saror kezeza.

28

Phawuloosa Malaxa giz haathar marintteez bi-itta qiteeza

¹ Nuunii gaxa saro kezeez wode helleez haathar teqintteez biittay Malaxa ginttintizana ereeza.

² Malaxa asay nuna qadhdhii ufayssar ekkeeza. Ira bukkiza gishonnee meeggiza gishos tama eethii nuna ubba mokkeeza.

³ Phawuloosa gaame afira shiishii tama gad-dodar, shooshii tamay michcheez gishos kezii e kushayil afa xaaxinttii eza dukkeeza.

⁴ Malaxa asay shooshii Phawuloosa kushayil xaaxintteeza bi7ii pettay pettayiko, «Tuma yha athay shemppo wodhdheez as; hara attozin ab-bapp E attinikka Xoossa pirddayppe attii path yezodayis danda7ekka» yeegeeza.

⁵ Zin Phawuloosa fa kushaypp shoosha wuxarkkii, tama oleeza; eza akkokka qohekka.

⁶ Unttii, «E asetithay ayidepp ayide, eelliza woy pokkii yhayqqiza» gi naagiza. Zin unddenna wode naageezin e asetithayil abikka laamint-teezbaz dhabin, «Yhay tuma Xoosse» yeegii fa qofa laammeeza.

⁷ Ye heera haathar teqintteez biittayis halaqa, Puploosa gizayis gade yeza; hayidzii gallas hello-dayis e nuna siiqor mokkeeza.

⁸ Puploosa aday oxe, misharannee gusor hargginttii woyi7ii yeza. Phawuloosa e kara gelii ees Xoossa woosseeza; fa kusha ezalli afa gaddii patheeza.

⁹ Yeypp guye, Malaxa yez hargginttiza hara asitayikka yi7ii paxeeza.

¹⁰ Unttii nuna gaame bonchcheeza; nuunii markkaber yhanigodayis denddeez wode oges beeziza baz nuus inggeeza.

Phawuloosa Malaxapp Oroome qiteeza

¹¹ Hayidzii aginapp guye, Malaxa balggo aathii Iskkinddire markkaber yhammadayis denddeez. Ye markkabayil afa Diyosqoroosa giz mentte eeqitay misile yeza.

¹² Sirakuuse katama gelii ezayid hayidzii gallas betteeza.

¹³ Yeypp denddii Regiyume katama helleeza. Pettii gallasapp guye, sulle bagga carkkay carkkin, wonttitha gallas Putiyoole katama helleeza.

¹⁴ Ezayid nuunii pettii pettii ammaniza asita denggin, paar saamintta gam7od garkk nuna woosseeza. Yeypp guye, Oroome yhanigeeza.

¹⁵ Oroome yez ammaniza asitay nu bagga si7ii, Afoosa Farusinannee, Hayidzii Aqiza aqo giz aqo hellodayis nuna mokkodayis ye7eeza. Phawuloosa untan bi7ii Xoossa galateeza e wozinaykka miinggeeza.

Phawuloosa Oroome

¹⁶ Nuunii Oroome geleez wode Phawuloosa fana naagiza wotaaddaritayir fa aaddas bettod garkk gintintteeza.

¹⁷ Hayidzii gallasapp guye, Phawuloosa Ayihuditay halaqita faako xeegeezeza. Unttii shiiqeez wode unttika, «Ta ishuntho, taanii nu asay woy nu aditay wogal afa aba qohokka oothekkaya, zin tana Yerusalaame accii Oroome asayis aathii inggeeza.

¹⁸ Unttii ta moota bi7ii yhayiqos helithiza baz taal afa abikka denggekka gishos tana bili7odayis qoppeeza.

¹⁹ Zin Ayihuditay yeya ixxin «Tabaz Qeesare pirddo» yeegeezapp attin taanii ta gadita mootiz-abaz yezin baaya.

²⁰ Taanii yinttan xeegeezezay yinttan be7adayisinnee yinttis yhaya ododadayisii. Taanii yha santhalatayir acintteezay Isreele asay naagiza ufayssay gishoss» yeegeeza.

21 Ayihude halaqitay Phawuloosako, «Nuus Yihudapp nees xaafintteez dabddaabbe hellekkay. Yeypp ye7eez asitaypp pettakka nees iita odeezay baaya.

22 Zin yha ne kaalliza ammana duma duma aqo asay ixizana nuunii eriza gishos ne qofa si7odayis koyiza» yeegeeza.

23 Unttii fa ye7od gallas Phawuloosas gamma ekkii, ye gallas gaanggii e yeza aqo ye7eeza. E wonttapp omath hellodayis Xooss kaatetithii bagga unttis markkatteeza. Ma unttii Yesu-usa bagga ammanoday garkk Muse higgennnee nabitay maxaafita lo7ithii tamaareeza.

24 Pettay pettay Phawuloosa geezana ammaneeza, zin yhankkitay ammanekkaya.

25 Unttii woli gancce odayil ma77aam ixxezaypp Phawuloosa pettibaz geezaypp guye yhanigeeza. E yhay garkk yeegeeza: «Geeshsha Ayyanay nu aditayis nabe Isiyaasa doonar odeezay tuma.

26 ««Neenii yha asayiko yhanigii,
yi sis si7iza, zin akaakooya;
Yi be7o bi7iza, zin denggooya.

27 Yha asay wozinay muumeeza;
u hayay tuleeza;
u aafaykka goozntteeza.

Yey baazako,
unttii fa aafayir bi7ii,
fa hayayir si7ii, fa wozinayir akaakii,
taako maaqqodazin;
taakka unttan pathodazin» yeegoba»
yeegeeza.

²⁸ «Yikkee, yhay Xooss atotith kiitay Ayihude baazitayis maaqqeezana eriza. Untikka si7oda» yeegeeza.

²⁹ Phawuloosa yeya geezaypp guye Ayihuditay woli gancce daro palamittar kezii qiteeza.

³⁰ Phawuloosa kera keetha nam77ii laythi muda betteeza; ezayid yezar faako ye7eezita ubba mukkiza.

³¹ Yashsha baythinnee ookka kayekkazin Xooss kaatetithibaz sabbakeeza; Goda Yesuus Kiristoosa bagga milxi udii taamarsseeza.

Oroth Caago **Melo New Testament Latin Version**

copyright © The Word for the World International

Language: (Melo)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

95113415-a3bd-5069-be47-fe8016d2f076